

BONAA

Musa takada plade

Musa kunna Misila 1:1-11:10

Luda bona kū Isarailanɔ Misila 12:1-15:21

Isarailanɔ kurena gbárannan 15:22-18:27

Luda baka kunna kū Isarailanɔ 19:1-20:26,
23:1-24:18

Bizakuta yã 31:1-18

Isarailanɔ Luda bàka kunna kũńwo yãgboronaa
32:1-34:35

Bizakutadɔnaa 40:1-38

Waridɔna Isarailanɔa Misila

¹ Isaraila né kū ò tà Misila kū n̄ de Yakubuo,
baadi kū a be gbẽnɔ tón dí:

² Rubeni, Simɛɔ, Levi, Yuda,

³ Isaka, Zɛbuluni, Biliaminu,

⁴ Dã, Nafatali, Gada kū Asao.

⁵ Yakubu buri pìnɔ n̄ pínki gbẽnɔn baaakɔ
akurime. Yusufu s̄ a gĩnake à kú Misila kò.

⁶ Akū Yusufu gà kū a v̄ninɔ kū gbẽ kū ò kun a
gɔrɔanɔ n̄ pínki.

⁷ Isarailanɔ né ì ò kè dasi ò kàra ò dasi kù mana-
mana, ò dà bùsuu p̄ila pínki.

⁸ Kína dufu kū à Yusufu d̄ro kpata blè Misila,

⁹ akū à p̄i a gbẽnɔnɛ: À Isarailanɔ gwa, ò dasi kū
ò dàóla.

¹⁰ Ò gé ò ɔndɔ keĩne de òsun kararo yã. Tó z̄i fùte,
ò na ó ibereɔa ò z̄i ká kũoo ò b̄te ó bùsun.

11 Akū ò gbě̀nɔ̀ d̄iténné n̄ dikirinɔ̀ ũ ò wé t̄ámma k̄ū z̄i gb̄ana kenaaɔ. Leme ò Pitomu k̄ū Rameseo k̄ate Firi'aunane a p̄oblekatekianɔ̀ ũ le.

12 Ama lán òten wari d̄ómma nà, leme òdigō kara le òten dagula, akū swèè kè Misilanɔ̀gu n̄ yā musu.

13 Akū ò n̄ dá z̄òz̄i p̄āsīn

14 ò n̄ p̄o yàka ò ẽ z̄i gb̄ana dà́nne k̄ū kúnkubonaaɔ k̄ū bura z̄i s̄inda p̄ínkio. Ò z̄i p̄inɔ̀ dà́nne p̄ínki p̄āsīp̄āsī.

15 Akū Misilanɔ̀ k̄ina Eberu néseterinɔ̀ s̄isi, a do t̄ón Sifira, a do Pua.

16 À p̄ínne: Tó áni né i Eberu n̄ogbēnɔ̀ne tera sa, tó ḡōgbēme, à a de. Tó n̄ogbēme s̄o, à a tó.

17 N̄ogbē p̄inɔ̀n Luda v̄ina v̄i, odi yā k̄ū à ò́nne kero, òten n̄égōgbēnɔ̀ tó.

18 Akū k̄ina p̄i n̄ s̄isi à n̄ lá à p̄i: À kè dera a kè le a n̄égōgbēnɔ̀ t̄o?

19 Ò wèa ò p̄i: Eberu n̄ogbēnɔ̀ de lán Misila n̄ogbēnɔ̀ bàro, ò w̄ana òdi né i ari ògō ká.

20 Leme Isarailanɔ̀ ten kara le òten dasi k̄ū. Akū Luda yā mana kè néseterii p̄inɔ̀ne

21 à n̄ gbá n̄éno, k̄ū ò a v̄ina v̄i yāi.

22 Akū Firi'auna yā d̄ite a gbēnɔ̀ne n̄ p̄ínki à p̄i: À Eberu n̄égōgbē k̄ū ò n̄ ínɔ̀ ká Nili ín n̄ p̄ínki, ama à n̄énogbēnɔ̀ tó.

2

Musa inaa

1 Levi buri ḡōgbē Levi buri n̄ogbē sè.

2 N̄o p̄ii n̄ò s̄i à né i ḡōgbē ũ. K̄ū à è né p̄i mana, akū à a ùte m̄o aakō.

³ Kū adi f̄s̄ à a ùte doro, à kepu t̄anko s̄è à òdaa l̄ea de í sún ḡe a ḡunlo ȳai. Akū à né p̄i d̄an à ḡe à d̄ite Nili í l̄ea kanda ḡun.

⁴ Né p̄i d̄are ze z̄a dire, àten gwa ȳa kū ani a le.

⁵ Akū Firi'auna n̄en̄gb̄e ḡe z̄ú o swai, a gb̄en̄ ten kure swa p̄i l̄ea. À t̄anko è ditena kandan, akū à a z̄on̄kpare z̄i à ḡe à a s̄e.

⁶ Kū à w̄e, à è né mé à dan, àten óo do. À k̄ene w̄enda à p̄i: Eberu n̄eḡgb̄eme.

⁷ Akū né p̄i d̄are s̄u à p̄i Firi'auna né p̄ine: N̄ ye mà gé mà Eberu n̄gb̄e s̄is̄inne àḡo ȳo kp̄anne né p̄ian ȳa?

⁸ À w̄ea à p̄i: N̄ gé! Akū n̄en̄gb̄e p̄i ḡe à né p̄i da s̄isi.

⁹ Firi'auna n̄en̄gb̄e p̄i p̄ine: N̄ né p̄i sé n̄ tá k̄ao n̄ḡo a gwam̄ene, maniḡo f̄ina bon̄ne. Akū à né p̄i s̄e à tà k̄ao, àteni a gwa.

¹⁰ Kū né p̄i z̄k̄o kū, à a s̄e à ḡe k̄ao Firi'auna n̄en̄gb̄e p̄ine, akū à a s̄i a né ũ. À t̄o kp̄ane Musa, zaakū à p̄i, a a bò í ḡum̄me.

Musa bàa lé à tana Midià b̄usun

¹¹ Z̄ikeya kū Musa z̄k̄o kū, à ḡe a buri Eberun̄o gwa, akū à z̄i gb̄ana kū òten ke è. À è Misila gb̄e teni a buri dake gb̄e.

¹² Kū à gu gw̄agwa, adi gb̄eke ero, akū à Misila gb̄e p̄i d̄e à a ùte b̄usu'at̄en.

¹³ Kū gu d̄o, à bò à Eberun̄o è gb̄en̄on pla, òten fiti ke. Akū à gb̄e kū a ȳa nnaro là à p̄i: B̄oȳai n̄eni n gb̄endo gb̄e?

14 À wèa à pì: Dí mé à n dite kína yāgōgōri ūwerεε? N̄ ye n̄ ma de lākū n Misila gbē dè n̄n yá? Akū vīna Musa kù à pì: Ò yā kū ma kèe d̄ fá!

15 Kū Firi'auna yā pì mà, àten wεε à Musa de, akū à bàa l̄ne à tà Midiā b̄sun, akū à v̄te l̄ḡo sare gwe.

16 Midiā sa'ori kun à n̄n̄gb̄n̄o v̄i gb̄n̄on suppla, akū ò sù ò í tò ò kà p̄kād̄n̄o gó ímikin n̄ de p̄kād̄n̄oε.

17 Kū sād̄ari ken̄o sù òten p̄m̄ma, akū Musa f̄te à yā s̄i k̄n̄wo, akū à í kp̄án̄ne n̄ p̄kād̄n̄o.

18 Kū ò tà n̄ de Rueli k̄naa, à n̄ lá à pì: À kè dera a su káaku le gb̄araa?

19 Ò wèa ò pì: Misila gōgbē ke mé à ó sí sād̄arin̄o. Àkū mé se à í tò à kp̄awεε ó p̄kād̄n̄o.

20 Akū à n̄ lá à pì: Ade pì kú máa? Bó yā mé à tò a gōgbē pì tò gwee? À a sísi à su à p̄ ble k̄oo.

21 Musa sù, akū à wè à v̄te kū gōgbē p̄io, akū gōgbē pì a n̄n̄gb̄e Zipora kp̄aa n̄o ū.

22 Akū Zipora né ì gōgbē ū, akū Musa tó kp̄ane Gε̄omu, à pì: Buri z̄t̄on ma ū gbē p̄and̄n̄o b̄sun la.

23 Kū à ḡi kè, akū Misilano kína ḡa. Isarailano teni nda z̄z̄i kū òten ke yāi, òten wiki lé, akū n̄ wiki p̄i kà Luda k̄naa.

24 À n̄ ndanaa mà, a bàka kū à kú kū Ibrah̄io kū Isaakuo kū Yakubuo dí sāguro.

25 Luda Isarailano gwà, akū ò k̄ne w̄nda.

3

Luda Musa sisinaa

¹ Musa teni a anzure Midiã bùsu sa'ori pókãdeno dā à vī gbárannala ari à kà kpi kũ òdi pi Orebu kīnaa.

² Akū Dikiri Malaikaa bò à sùà tévuraa gūn tariankpān. Musa tariankpā pìi gwà à è té kúa, ama àten té kũro.

³ Akū à pì: Mani gé mà daboyã pì gwa de mà dō pō kũ à tò tariankpā pì ten té kũro.

⁴ Kū Dikiri è à sù gwa, akū à lé zùì zaa tariankpā pìi gūn à pì: Musa! Musa! Akū à wèa à pì: Makū di!

⁵ Luda pìne: Ìsun nairo. Ì n kyate bobo, zaakū gu kũ ñ zen kun adoname.

⁶ Akū à pì: Makūme n dizino Ibrahimĩ kũ Isaakuo kũ Yakubuo Luda ũ. Akū Musa pō kũ a wéa, kũ à wé kena pla kũ Ludao vīna vī yāi.

⁷ Akū Dikiri pì: Ma yā'ūmmana kũ ma gbēno ten ke Misila è, ma wiki kũ ñ wétāmmarinno tò òten lé mà. Má ñ wāwākenaa dō.

⁸ Ma kipa mà ñ sí Misilanoa mà ñ bote bùsuu pìn mà gé kũnwo bùsu mana yàasan, gu kũ vī kũ zó'io dìn, bùsu kũ Kanaanon kun kũ Itino kũ Amōrinno kũ Perizino kũ Ivinno kũ Yebusinno.

⁹ Isarailano wikilena kà ma kīnaa tera sà, ma wari kũ Misilano ten dōmma è.

¹⁰ Ì gé tera sà, ma n zī Firi'aunaame de ñ ma gbē Isarailano bote Misila.

¹¹ Akū Musa pì Ludane: Dín ma ũ kũ mani gé Firi'auna kīnaa mà Isarailano bote Misilai?

¹² Luda pìne: Manigō kú kũnwo. Zīna kũ ma n zī sèedaan dí. Tó n ñ bote Misila, áni donyī kemene kpi dí pōtea.

¹³ Akū Musa pì Ludane: Tó ma ge ma ò Isarailanone ma pì, ñ dizino Luda mé à ma zīmma, tó ò ma la n tōi sō bi? Mani piñne deramee?

14 Luda wèa à pì: Makūme gbē kū má de a ũ ũ. Ñ ońne makū mé ma n zĩmma.

15 Luda pìne do: Ñ o Isarailanone makū Dikiri n̄ dizin̄o Ibrahĩ kū Isaakuo kū Yakubuo Luda mé à n zĩmma. Ma tón gwe goro s̄inda pínki. Àgō ma sísi le ari á buria.

16 Ñ gé ñ Isaraila gbē zōkōn̄o kakara ñ ońne makū Dikiri n̄ dizin̄o Ibrahĩ kū Isaakuo kū Yakubuo Luda mé à bō à s̄umma. Ñ ońne mateni n̄ e ma yā kū òten keńne Misila è.

17 Mani n̄ bote Misila gu kū òten wé tām̄ma pìn, mani gé kũńwo b̄usu kū Kanaan̄on kun kū Itin̄o kū Am̄orin̄o kū Perizin̄o kū Ivin̄o kū Yebusin̄o, gu kū v̄i kū z'io din.

18 Oni n yā ma. Mōkōn kū Isaraila gbē zōkōn̄o à gé à Misila kina le à one makū Dikiri Eberun̄o Luda ma bo ma suáwa, ma pì à á gba zé à gé goro aakō ke gbárannan de à sa o makū Dikiri á Ludaa.

19 Má d̄s kū Misila kina ni we à géro, tó adi ke ma a dà tilasiro.

20 Mani o t̄s Misilan̄o, mani daboyān̄o ke mà wé t̄aom̄ma, gbasa à á gbar̄e.

21 Mani tó Misilan̄o á wé gwa, de tó át̄en tá, áni tá okoriro.

22 Á n̄ogbē s̄inda pínki andurufu ke wura n̄omanableb̄on̄o kū p̄okasan̄o gbeka a Misila n̄ogbē dakea kū n̄ n̄ogbē kū ò kú a bean̄o, à da á négōgbēn̄one kū á n̄énogbēn̄o. Len áni Misilan̄o pón̄o símma le manamana.

4

Luda Musa gbana daboyakena zé

¹ Musa wèa à pì: Tó odi ma náani kero, akū odi ma yā maro, tó ò pì məkōn mé n bo n sumaro sō bi?

² Akū Dikiri a là à pì: Bón n kūna gwee? À wèa à pì: Gòome.

³ Dikiri pìne: Ì gòo pì pāte zīte. Kū à pāte, akū à li mlè ũ, akū Musa a zīda gà gwe.

⁴ Dikiri pìne: Ì ɔ bo ò a kū a vlāa. Kū à kù, akū à èra à li gò ũ a ɔ.

⁵ Dikiri pìne: Len ìni ke le, de ò sí kū makū Dikiri n dizin Ibrahimī kū Isaakuo kū Yakubuo Luda mé à bò à sùmma.

⁶ Dikiri èra à pìne do: Ì n ɔ soto n utan. Akū à sòton. Kū à bò, à è a ɔ li kusu ũ, à kè púu lán buu bà.

⁷ Dikiri pìne: Ì era ò n ɔ soto n utan. À èra à sòton. Kū à bò, à è à kè a gbèn.

⁸ Dikiri pìne: Tó odi n náani ke ò sèeda káaku sìro, ò kpekepe pò sí.

⁹ Tó odi sèeda pla pìnɔ sí ò n yā mà sōro, ò Nili í tó ò kóte zīte, ani li aru ũ.

¹⁰ Akū Musa pìne: N yā nna Dikiri! Zaa zī yā'onaa araga kūmaoro. Bee zaa goro kū n yā òmene, ma lé tikisime.

¹¹ Akū Dikiri pìne: Dí mé à lé dō bisāsirinεε? Dí mé àdi a néné nate ke àdi a sáto kūu? Dí mé àdi tó à gu e ke àdi a vīna kūu? Makū Dikiri, makūroo?

¹² Ì gé! Mani kpányī kū yā'onaa, mani yā kū ìni o danne.

¹³ Akū à pì: N yā nna Dikiri! N yā nna! Ì gbē pānde zī.

¹⁴ Akū Dikiri pò fè kū Musao à pì: N vīni Haruna Levi buri kunloo? Má dō kū yā'ona zī'ū káaoro.

Àten su danɛ. Tó á wé kè pla, a pɔ ni kɛ nna.

¹⁵ Ñ yā o káao ñ yā kū ani o danɛ. Makū, manigõ kpái kū yá'onaao, manigõ yā kū áni kɛ daáɛ.

¹⁶ Ani yā o gbɛ̀nɔnɛ n gɛ̀nɛ ũ, anigõ de n légbekpari ũ, ñigõ denɛ lán Luda bà.

¹⁷ Ñ gò dí sé ñgõ kūna ñ sèedanɔ kɛo.

Musa ɛrana Misila

¹⁸ Musa tà a anzure Yɛtoro kīnaa à pìnɛ: Ñ ma gba zé mà tá ma gbɛ̀nɔ kīnaa Misila, mà e tó ò kpé kú kú wèndiio ari tera. Yɛtoro pìnɛ: Ñ kipa aafia.

¹⁹ À sù à lè Dikiri ò Musanɛ Midiã bùsun à pì: Ñ fute ñ tá Misila, zaakū gbɛ̀ kú òtɛni n wɛtɛ ò n de yānɔ gàga ñ pínki.

²⁰ Akū Musa a nanɔ sè kū a négõgbɛ̀nɔ à ní dí zaakia, à ɛra àten tá Misila à Luda gòo pì kūna.

²¹ Akū Dikiri pìnɛ: Tó n ka Misila, ñ daboyā kū ma a gbāna kpāmmanɔ kɛ Firi'auna arɛ pínki. Ama mani a kùgbāna kū, ani gí gbɛ̀nɔ gbarɛi.

²² Ñ onɛ makū Dikiri ma pì, Isaraila burimɛ ma daudu ũ,

²³ akū ma pìnɛ à ma daudu gbarɛ à gé donyĩ kemɛnɛ. Lákū à gí a gbarɛi nà, mani a daudu de sà.

²⁴ Zé gūn Musa ten i gukea, akū Dikiri a lè gwe à ye à a de.

²⁵ Akū Zipora gbè fɛ̀nɛ sè à a né t̃ɔ z̃ɔ à a gyɔfɔrɔ nà Musa gbáa à pì: Yāpuramɛ, ñ demɛnɛ gõ arude ũ.

²⁶ T̃ɔz̃ɔna bire yāin à pìnɛ gõ arude. Akū Dikiri Musa tò.

²⁷ Dikiri pì Harunanɛ: Ñ gé da Musalɛ gbárannan. Akū à gèè à a lè Luda kpi kīnaa, à lé pèa.

²⁸ Musa yā kū Dikiri a zĩ à o bàba Harunanε kū sèeda kū à pìne à kenɔ.

²⁹ Akū Musa kū Harunao tà Misila ò Isaraila gbē z̄skōnɔ kākara.

³⁰ Haruna yā kū Dikiri ò Musanε bàbañne ní pínki, akū Musa daboyā pìnɔ kè Isarailanɔ wára.

³¹ Ò yā pìi sì. Kū ò mà Dikiri mé à sù ní gwa à ní yā'ūmmanaa è, akū ò kùte ò donyĩ kènε.

5

Musa kū Harunao gēna Firi'auna arε

¹ Abire gbera Musa kū Harunao gēε ò Firi'auna lè ò pìne: Yā kū Dikiri Isarailanɔ Luda òon dí. À pì ò a gbēnɔ gbarε ò gé dikpe keare gbárannan.

² Firi'auna wèrma à pì: Díme Dikiri ũ kū mà a yā ma mà Isarailanɔ gbarεε? Má Dikiri dōro. Mani Isarailanɔ gbarero.

³ Akū ò pìne: Eberunɔ Luda bò à sùwá. N ó gba zé ò gé ò gɔrɔ aakō ke gbárannan ò sa o Dikiri ó Luda pìia, de àsun gyā káwáiro kesō z̄i.

⁴ Akū Misila kína pìi pì Musanε kū Harunao: À kè dera a tò gbēnɔ laakari ten go ní z̄iaa? À era á z̄ia.

⁵ Akū à era à pì: Kū gbēnɔ dasi kù sà, akū á ye ò kámma bo kū ní z̄io yá?

⁶ Zĩ birea Firi'auna yā dìte Isaraila wétámmarinɔne kū ní don'aredenɔ à pì:

⁷ Àsun sēburu kpárma ò kúnku keo lákū adì ke nà yā doro. Ò gé ò ní pó kē ní z̄ida.

⁸ Ama ò kúnku ke lákū òdi ke nà yā lén. Àsun lagoñero, zaakū ma'ādenɔme. A yā mé à tò ní wiki dīgō dɔ, òten pi ò ye ò gé sa o ní Ludaame.

9 À zĩ karańne de òsun ãampaki le ò laakari kpá ékeyãna doru.

10 Akū n wétãmmarii pĩno kũ n don'arɛdeno sù ò pĩńne: Firi'auna pì òsun sèburu kpááwa doru.

11 À gé à wete á zĩda gu kũ áni len. Bee kũ abireo óni zĩ lagoáero, bee fíti.

12 Akū ò fãkõa ò gèe Misila gu sĩnda pĩnki sè kè sèburu ũ.

13 N wétãmmarii pĩno òdĩgõ nakaramma lãkũ gu òdĩgõ do nã, de ò n zĩ lãka lãkũ òdi lãka nã goro kũ òdi sèburu kpãmna.

14 Ò gbẽnaa kè Isaraila don'arɛde kũ n wétãmmarinõ ditenõne ò pĩńne: À kè dera ádi kũnku ke gbãra ke gĩa à kã lãkũ ò a lé òditeáre nã yãroo?

15 Akū Isaraila don'arɛdeno gèe ò wiki lè Firi'aunaa ò pì: À kè dera nten ke ókõno n zòblerinõne lɛɛ?

16 Òteni sèburu kpáwã doru, akū òten pi ò kũnku ke. Òteni ó gbẽ, ama n gbẽno mé ò taari vĩ.

17 Akū à pì: Ma'adenon á ũ. Len á de le! A yã mé à tò adĩgõ pì áni gé sa o Dikiria.

18 À gé zĩ ke. Oni sèburu kpááwa doru, bee kũ abireo áni kũnku ke lãkũ ò dàáre nã léa.

19 Kũ ò ò Isaraila don'arɛdenõne òsun goro do kũnkubona lagoro, ò dè kũ ò yã è sã.

20 Kũ ò bò Firi'auna kĩnaa, ò dàkare kũ Musao kũ Harunao, òteni n dã,

21 akū ò pĩńne: Dikiri á yã gwa à yãkpate ke kãáo, zaakũ a tò Firi'auna kũ a gbẽnon ye ó kãiro. A ó dena zé kpãmman gwe.

²² Akū Musa èra à gèè à pì Dikirine: Dikiri, bóyāi n wari dò gbē pìnɔaa? Abire yāin n ma zī yá?

²³ Zaa gɔrɔ kū ma ge ma yā ò Firi'aunanε kū n tóo, akū àten wari dɔ n gbēnɔa, akū ndi n bo s̄ro bi!

6

Dikiri lésena Musanε Isarailanɔ surabana yā musu

¹ Akū Dikiri pìnε: Ìni yā kū mani ke Firi'aunanε e tera. Ani n gbare ma gbāna zōkō yāi. Ani péríma a būsun ma gbāna zōkō yāi.

² Akū Luda èra à yā ò Musanε à pì: Makūmε Dikiri ũ,

³ ma bo ma su Ibrahī kū Isaakuo kū Yakubuooa Luda Gbānasīndapinkide ũ, ama odi ma dō ma tó Dikiriaro.

⁴ Ma bàka kú kúnwo, ma pì mani Kanaanɔ būsú kú ò kú a gūn buri zītɔ ũ kpáríma.

⁵ Ma Isarailanɔ ndanaa mà n zòblena Misi-lanɔne yāi, akū ma bàka kú à kú kúnwoo pì yā dí sāmaguro.

⁶ A yā mé à tò n o Isarailanɔne makūmε Dikiri ũ. Mani á bo zī gbāna kū Misilanɔ dàáre gūn, mani á bo zòblen. Mani yákpate ke kúnwo mani a bo kú ma gāsā gbānao.

⁷ Mani á sé ma gbēnɔ ũ màgō de á Luda ũ, áni gō dō kú makūmε Dikiri á Luda kú à á bó Misila zī gbāna gūn ũ.

⁸ Mani gé kááo būsú kú ma a la dà Ibrahīne kú Isaakuo kú Yakubuo gūn. Mani á gba àgō vī. Makūmε Dikiri ũ.

⁹ Musa yā pì ò Isarailanɔne, ama odi a yā maro kú zòzī pásī n mēè yò yāi.

10 Akū Dikiri ò Musanε à pì:

11 Ñ gé ñ o Misilano kína Firi'aunanε à Isarailano gbarε ò bote a bùsun.

12 Akū Musa wè Dikiria à pì: Lákū Isarailano ò dì ma yā maro nà, makū kū ma lé tikisi, deran Firi'auna ni ma yā ma sō?

Musa kū Harunao buri bozirε

13 Dikiri yā ò Musanε kū Harunao Isarailano yā musu kū Misila kínao, à òñne ò bote kū Isarailano Misila.

14 Ñ buri ɔmbede káakunɔ tón dí. Isaraila daudu Rubeni négɔgbɛ̀nɔn dí: Anɔku, Palu, Ezerɔnu, Kaami. Rubeni burinɔn gwe danɛdanɛ.

15 Simeɔ négɔgbɛ̀nɔn dí: Yemueli, Yami, Oada, Yakī, Zoa kū Kanaa nɔgbɛ̀ né Soluo. Simeɔ burinɔn gwe danɛdanɛ.

16 Levi négɔgbɛ̀nɔ tón dí n burinɔa: Gesɔmu, Koa, Merari. Levi kè wè basuddo akuri awɛɛsupplamɛ.

17 Gesɔmu négɔgbɛ̀nɔn dí n burinɔa danɛdanɛ: Libini kū Simeio.

18 Koa négɔgbɛ̀nɔ tón dí: Amlamu, Iza, Eblɔnu, Uzieli. Koa kè wè basuddo akuri awɛɛ'aakɔmɛ.

19 Merari négɔgbɛ̀nɔn Mali kū Musio ũ. Levi burinɔn gwe danɛdanɛ.

20 Amlamu a dasɛ Yɔkɛbedi sè nɔ ũ, akū à Haruna kū Musao ì káao. Amlamu kè wè basuddo akuri awɛɛsupplamɛ.

21 Iza négɔgbɛ̀nɔn Kora kū Nefegio kū Zikirio ũ.

22 Uzieli négɔgbɛ̀nɔn Misaili kū Elɛzafáo kū Sitirio ũ.

23 Haruna Aminadabu né Elisɛba, Nasɔ dāre sè nɔ ũ, akū à Nadabu kū Abiuo kū Elɛzao kū Itamao ì káao.

24 Kora négõgbẽnɔn Asi kũ Elekanao kũ Abi-asafao ũ. Kora burinɔn gwe danɛdanɛ.

25 Haruna né Eleaza Putieli nénõgbẽnɔ doke sè nɔ ũ, akũ à Finɛasi ì kãao. Levi buri ɔmbede káakunɔn gwe danɛdanɛ.

26 Haruna kũ Musa kũ Dikiri òńne ò Isarailanɔ bɔte Misila gà kũ gãaon gwe.

27 Mókõnɔ mé ò yã ò Misilanɔ kína Firi'aunanɛ de ò Isarailanɔ bɔte Misila.

28 Kũ Dikiri yã ò Musanɛ Misila,

29 à pì akãame Dikiri ũ, yã kũ áten onɛn à o Firi'aunanɛ pínki.

30 Akũ Musa pìne a lé tikisi, deran Firi'auna ni a yã maa?

7

Kisira mèn kuri zĩna Misilaa

1 Akũ Dikirii pì Musanɛ: N̄ gwa! Ma n ke lán ma bà Firi'aunanɛ, akũsõ n v̄ni Haruna de n légbekpari ũ.

2 N̄ yã kũ ma ònne pínki o n v̄ni Harunanɛ, ani o Firi'aunanɛ à Isarailanɔ gbare ò bɔte a bùsun.

3 Bee kũ abireo mani a kù ke gbãna. Mani sèedanɔ kũ daboyãnɔ ke Misila dasi,

4 ama Firi'auna ni á yã maro. Mani ɔ t̄s̄ Misilaa mà yãkpatɛ ke kũńwo pãsipãsi, mani bo kũ ma zìkari Isarailanɔ gà kũ gãao.

5 Tó ma bo kũ ma gbãnao Misilaa, mani Isarailanɔ bɔten, Misilanɔ ni d̄s̄ sà kũ makũme Dikiri ũ.

6 Akũ Musa kũ Harunao kè lákũ Dikiri òńne nà.

7 Gɔrɔ kũ ò yã ò Firi'aunanɛ, Musa kun w̄ɛ basiikõ, Haruna s̄ w̄ɛ basiikõ awɛɛ'aakõ.

8 Akū Dikiri pì Musanɛ kū Harunao:

9 Tó Firi'auna daboyā gbèkamma, ò Harunanɛ à a gò sé à pàte a arɛ, ani li mlè ũ.

10 Kū Musa kū Harunao gèe Firi'auna kīnaa, ò kè lākū Dikiri ònne nà. Haruna a gòo sè à pàte Firi'auna kū a ìbano arɛ, akū à li mlè ũ.

11 Akū Firi'auna Misila wézērinɔ kū ezedenɔ sisi, akū ò daboyā dokɔnɔ pìnɔ kè se ñ ezedeke gūn.

12 Kū ñ baadi a gòo pàte, akū ñ gòo pìnɔ li mlènɔ ũ, akū Haruna gò ñ pónɔ mòmɔ.

13 Firi'auna sã gbāname, adi ñ yā maro lākū Dikiri ò nà.

Ínɔ linaa aru ũ

14 Dikiri pì Musanɛ: Firi'auna kù gbāna à gì gbēnɔ gbareì.

15 Ñ gé ñ a le zia kɔnkɔ gɔrɔ kū àten gé swai. Ñgɔ a dā Nili sarɛ gwe. Ñgɔ n gò kū à li mlè ũ pì kūna.

16 Ñ pine makū Dikiri Eberunɔ Luda ma n zīa, n òne à ma gbēnɔ gbare ò gé donyī kemene gbáranan, ama ari tera à gīmai.

17 Makū Dikiri ma pì, yā kū ani tó àgɔ dɔ kū makūme Dikiri ũn dí. Tó n Nili í lè kū gò kū ñ kūnao, ani li aru ũ.

18 Kpò kū ò kú í pì gūnnɔ ni gaga, Nili í ni gbī sɔ, Misilanɔ ni fu í pì minaa.

19 Akū Dikiri èra à pì Musanɛ: Ñ o Harunanɛ à a gò sé à dɔ Misila ínɔ la, ñ swanɔ kū ñ swa'ɔnenɔ kū ñ ísēbokinɔ kū ñ íkakinɔ pínki ni gɔ aru ũ. Aru nigɔ dagula Misila, bee kū kpēnenɔ kū orozā gūnnɔ.

20 Akū Musa kū Harunao kè lākū Dikiri òńne nà. Haruna a gòo pìi sè, à Nili í lèo Firi'auna kū a ìbano wára, akū í pìi gò aru ũ pínki.

21 Kpò kū ò kú a gūnno gàga, akū Nili í pìi gbĩ sō, Misilano fùà ò mi. Aru dàgula Misila.

22 Misila ezedenò kè le se ní ezedeke gūn, akū Firi'auna kùgbāna kũ, adi ní yā maro lākū Dikiri ò nà.

23 Firi'auna èra à tà a bea, adi yā pìi da sero.

24 Misilano bia yòyò Nili bara de ò í mi, zaakū odi fò ò swada'i mìro.

25 À kun le ari goro supplame Dikiri Nili lenaa gbera.

8

Blòno dagulanaa

1 Akū Dikiri pìi Musane: Ì gé ò o Firi'aunane, makū Dikiri ma pìi à ma gbèno gbare ò gé donyĩ kemene.

2 Tó à gí ní gbarei sō, mani tó blòno da a būsu gu sīnda pínki la.

3 Blòno ni Nili pa ari ò bikū bara, ò gē a onn ari a kpén, ò didi a gádoa. Ò gē a ìbano onno gūn kū a gbèno onno. Ò ká a kīnino kū a góno gūn.

4 Blòno ni didia kū a gbèno kū a ìbano ní pínki.

5 Dikiri èra à pìi Musane: Ì o Harunane à a gò sé à do swanola kū swa'oneno kū ísèbokinò, blòno ni da Misila būsula.

6 Kū Haruna a gòo dō Misila ínola, akū blòno bòte ò dà būsuu pìla.

7 Akū ezede pìno kè le se ní ezedeke gūn, ò tò blòno dà Misilala.

⁸ Akū Firi'auna Musa kū Harunao s̄isi à p̄i: À kúte ke Dikirine à bl̄n̄o kēma kū ma gbēn̄o, mani á gbēn̄o gbar̄e ò gé sa oa.

⁹ Akū Musa p̄i Firi'aunan̄e: Ñ̄ ḡōo dit̄em̄ene mà kúte k̄enne Dikirine kū n̄ iban̄o kū n̄ gbēn̄o, de à bl̄n̄o kēmma kū n̄ ɔ̄n̄o òḡo kú swai ado.

¹⁰ Firi'auna p̄i: Zia. Akū Musa p̄i: Ani ke lákū n̄ ò nà, de ñ̄ḡo d̄s̄ kū gbēke de lán Dikiri ó Luda bàro.

¹¹ Bl̄n̄o ni kēmma kū n̄ ɔ̄n̄o kū n̄ iban̄o kū n̄ gbēn̄o òḡo kú swai ado.

¹² Kū Musa kū Harunao b̄o Firi'auna k̄ĩnaa, Musa wé kè Dikiria bl̄b̄ kū ò dà Firi'aunalan̄o yā musu.

¹³ Dikiri Musa wéke s̄i, akū bl̄n̄o ḡaga kp̄en̄o gūn̄ kū ɔ̄n̄o kū buran̄o.

¹⁴ Ò n̄ kákara, akū b̄usu gb̄i s̄ò p̄ínki.

¹⁵ Kū Firi'auna è à kè s̄ána, a s̄a kp̄é gb̄ána, akū à ḡi Musa kū Harunao yā mai lákū Dikiri ò nà.

Sàa dagulanaa

¹⁶ Dikiri p̄i Musan̄e: Ñ̄ o Harunan̄e à a ḡo sé à z̄ĩte léo, b̄usutiti ni li s̄a ù Misila gu s̄ĩnda p̄ínkia.

¹⁷ Akū ò kè le. Haruna a ḡo s̄e à z̄ĩte léo, akū b̄usutiti li s̄aan̄o ù, ò dà bis̄asirin̄ola kū n̄òb̄n̄o. Misila b̄usutiti li s̄aan̄o ù p̄ínki.

¹⁸ Ezed̄en̄o ȳò ò gwà se n̄ ez̄edeke gūn̄, akū ò f̄ua. S̄aan̄o dà bis̄asirin̄ola kū n̄òb̄n̄o.

¹⁹ Akū ez̄eden̄o p̄i Firi'aunan̄e: Luda ɔ̄gb̄eme. Ama Firi'auna s̄a kp̄é gb̄ána, à ḡi n̄ yā mai lákū Dikiri ò nà.

Íf̄n̄in̄o dagulanaa

20 Dikiri pì Musanɛ: Ì fute kɔnkɔkɔnkɔ ò gé ò Firi'auna le gɔɔ kù àten gé swai, ò onɛ makū Dikiri ma ò, à ma gbɛ̀nɔ gbare ò gé donyĩ kemɛnɛ.

21 Tó à gí ñ gbareì, mani ífíninɔ daala kù a ìbanɔ kù a gbɛ̀nɔ kù a kpénɔ. Misila kpénɔ ni pa kù ífíninɔ, bee zĩte oni daala.

22 Gɔɔ birea mani Gosɛ̀ b̀usu gu kù ma gbɛ̀nɔn kun bo ado. Gwen ífíninɔ ni dan gularo, de àgɔ̀ dɔ̀ kù makūmɛ Dikiri ũ a b̀sun.

23 Mani ma gbɛ̀nɔ dɔ̀kɔ̀nɛ kù a gbɛ̀nɔ. Zian sèedaa pì ni ke.

24 Akū Dikiri kè le. Ífíninɔ kà Firi'auna ɔnn kù a ìbanɔ ɔnnɔ. Misila yàka pínki ífíninɔ yāi.

25 Akū Firi'auna Musa kù Harunao s̀isi à pì: À gé sa o á Ludaa b̀sun la.

26 Akū Musa p̀inɛ: Ani sí ke ò ke lero, zaakū pó kù óni sa o Dikiri ó Ludaa pì de Misilanɔnɛ t̀è ũmɛ. Tó o sa ò kù pó kù à deñnɛ t̀è ũo ñ wára, oni ó pápa kù gbèɛo ò ó deɛeroo?

27 Óni táa o gbárannan gɔɔ aakɔ̀mɛ, gbasa ò sa o Dikiri ó Ludaa lákū à òwɛɛ̀ nà.

28 Akū Firi'auna p̀i: Mani á gbare à gé sa o Dikiri a Ludaa gbárannan, ama àsun gé z̀aro. À kúte kenɛmɛnɛ.

29 Musa p̀inɛ: Tó ma ta, mani kúte kenɛ, ani ífíninɔ kēmma zia kù n ìbanɔ kù n gbɛ̀nɔ. Ama òsun manafiki ke doro. Ì tó gbɛ̀nɔ gé sa o Dikiria.

30 Kù Musa b̀o Firi'auna kīnaa, a kúte kènɛ Dikirinɛ.

31 Dikiri a wéke s̀i, akū ífíninɔ kè Firi'aunaa kù a ìbanɔ kù a gbɛ̀nɔ. Adi gɔ̀ gukearo, bee mèn do.

32 Ama Firi'auna s̀ā kpé gbāna ari tera, à gí ñ gbareì.

9

Pókādeno gaganaa

¹ Dikiri pì Musane: Ñ gé ñ Firi'auna le ñ one Dikiri Eberuno Luda pì, à ma gbēno gbarɛ ò gé donyī kemene.

² Tó à gì ní gbarɛi, tó à kpé ní kūna ari tera,

³ mani ɔ t̄s̄ a pókādeno a buran. Mani gagagyā pāsī ká a s̄onon kū a zaakinɔ kū a lakuminɔ kū a z̄unɔ kū a s̄anɔ kū a bl̄enɔ.

⁴ Mani Isaraila pókādeno d̄sk̄one kū Misilano p̄onɔ. Isarailano pókādeno ke ni garo.

⁵ Makū Dikiri ma a ḡoro d̄ite. Zian mani abire ke b̄usun la.

⁶ Kū gu d̄ò, akū Dikiri k̄e ɛ. Misilano pókādeno ḡaga p̄inki, ama Isarailano pókādeno ke dí garo.

⁷ Firi'auna yā kū à k̄e p̄ii gb̄eka, à mà Isarailano pókādeno ke dí garo, ama a s̄a kpé gb̄ana, à gì gb̄e p̄inɔ gbarɛi.

B̄b̄unu kana Misilangu

⁸ Dikiri pì Musane kū Harunao: À t̄amakpe túbu d̄a okū dodo, Musa f̄a Firi'auna are.

⁹ Ani da Misila b̄usula p̄inki lán lukut̄e bà, ani ke bis̄sirinone kū n̄b̄onɔ b̄b̄unu ũ gu s̄inda p̄inkia.

¹⁰ Akū ò t̄amakpe túbu s̄ete ò ḡeɛo Firi'auna k̄inaa. Kū Musa túbu p̄ii f̄a musu, akū à k̄e bis̄sirinone kū n̄b̄onɔ b̄b̄unu ũ.

¹¹ Ezedenɔ dí f̄s̄ ò ḡeɛ Musa k̄inaaro b̄b̄unu p̄inɔ yāi, zaakū à dànl̄a kū Misilano ní p̄inki.

¹² Akū Dikiri Firi'auna k̄uu k̄e gb̄ana, l̄akū à ò Musane n̄a, akū à gì ní yā mai.

Legugbe manaa

13 Dikiri pì Musane: Ì fute kɔnkɔkɔnkɔ ò gé ò Firi'auna le, ò onε makū Dikiri Eberuno Luda ma pì, à ma gbēno gbare ò gé donyī kemene.

14 Tera sà mani yā pāsī pínki daala kū a ibanɔ kū a gbēno, de àgō dō kū andunia gūn pínki gbēke de lán ma bàro.

15 Zaa kū tó ma ɔ tòm ma ma gagagyā kàngu yā, de àkū kū a gbēno làka andunia gūn.

16 Ma a kà kpatan de mà a gbāna mone, ò ma tó kpá andunia gūn pínki.

17 Lákū àteni a zīda bi, à gí ma gbēno gbarai ari tera,

18 zia mandara'i mani tó legūgbε pāsī ma manamana, legūgbε kū a taka buri dí ma Misila zikiro zaa lákū ò a kàte nà ari kū a gbārao.

19 Ì onε à gbēno zī ò a pókādenɔ kū pó kū à vī buranɔ sété ò káka kpén pínki. Bisāsirinɔ kū pó kū ò kú bàainɔ, tó òdi gē kúnwo kpénlo, legūgbε ni maíma oni gagame.

20 Firi'auna iba kenɔ vīna kè Dikiri yāne, ò ñ zīkerinɔ kū ñ pókādenɔ kàka kpén.

21 Ama gbē kū odi Dikiri yā daronɔ ñ zīkerinɔ kū ñ pókādenɔ tò bàai.

22 Akū Dikiri pì Musane: Ì ɔ sé musu, legūgbε ni ma bisāsirinɔ kū pókādenɔ kū burapɔna Misila būsu gu sīnda pínkia.

23 Kū Musa a gòò dō musu, Dikiri tò legū ten pūtā, àten ma kū gbēeo, àten pí, akū sura ten kipa zīte. Dikiri legūgbε kà Misilanɔgu.

24 Legūgbε ten ma, legū ten pí. Legūgbε pì pāsī. Zaa lákū Misila būsu kun nà, legū dí taka buri dí ma zikiro.

²⁵ Legūgbεε pì pók kũ ò kú bàai Misila bùsu gūnno ásarú kè pínki, bisásirinó kũ pókādenó kũ burapónó pínki. À sènte línó è'ε pínki.

²⁶ Gosē bùsu gu kũ Isarailanón kunn legūgbεε pì dí kánlo ado.

²⁷ Firi'auna Musa kũ Harunao s̀isi à p̀ínne: Tera sà ma durunna kè. Dikiri yā mé à nna, makũ kũ ma gbēno taaridenón ó ũ.

²⁸ À kúte kenε. Legūpūtāna kũ legūgbε díkīnao mò le. Mani á gbare sa, mani gíare doro.

²⁹ Musa p̀ine: Tó ma bo wēte kpe, mani ma onó sé lei gena Dikiri kīnaa, legūpūtāna ni ze, legūgbε ni láka, de ñgō dō kũ zīte bi Dikiri p̀ome.

³⁰ Ama má dō kũ m̀okōn kũ n ìbanó, àten vīna ke Dikiri Ludanero ari tera.

³¹ Nagā kũ gbadoo yàka, zaakũ nagā gīnake à p̀ia, gbado mure bò.

³² Ése kũ werao dí yakaro, kũ òdi ma kpekpe yāi.

³³ Musa bò Firi'auna kīnaa à g̀εε wēte kpe, à a onó sè lei gena Dikiri kīnaa, akũ legūpūtāna kũ legūgbεεo zè, legū dí ma doro.

³⁴ Kũ Firi'auna è legū kũ legūgbεεo kũ legūpūtānaao zè, akũ à kpé àten durunna ke, a sà kpé gbāna, akũ kũ a ìbanó.

³⁵ A kũ kpé gbāna à g̀i Isarailanó gbare, lákũ Luda dà Musane à òne nà.

10

Kwanó dagulanaa

¹ Dikiri p̀i Musane: Ñ gé Firi'auna kīnaa, zaakũ ma a kũ ke gbāna kũ a ìbanó, de mà a daboyā dínó ke ñ té,

² de ò le ò n nénɔnɛ kũ n daikorenɔ lákũ ma wé tã Misilanɔa nà kũ daboyã kũ ma kè ñ ténɔ, àgõ dõ kũ makũmɛ Dikiri ũ.

³ Akũ Musa kũ Harunao gèe ò pì Firi'aunane: Dikiri Eberunɔ Luda pì, ñinigõ kun mìnatenaaɛ sari ari bɔremɛɛ? Ñ a gbẽnɔ gbare ò gé donyĩ keɛɛ.

⁴ Tó n gi ñ gbare, zia ani kwano ká n busun.

⁵ Ò da zítela, oni gu ero. Ò léte pó kũ ò gõnne legũgbɛɛ gberanɔa kũ líno pínki.

⁶ Ò pa n kpénɔ gũn kũ n ibanɔ pónɔ kũ Misilanɔ pónɔ pínki. N denɔ kũ n dizinɔ dí a taka e zikiro, zaa gɔɔ kũ ò vùte bùsu dín ari kũ a gbãrao. Akũ Musa èra à bò Firi'auna kĩnaa.

⁷ Firi'auna ibanɔ pìne: Gbẽ pìnɔ nigõ kisira dawá le ari bɔrɛɛ? Ñ gbẽ pìnɔ gbare ò gé donyĩ ke Dikiri ñ Ludanɛ. Ñ dõ kũ Misila kàkateroo?

⁸ Akũ ò èra ò sù kũ Musao kũ Harunao Firi'auna kĩnaa, à pìnne: Á gé donyĩ ke Dikiri á Ludanɛ. Á dínɔ mé oni géɛ?

⁹ Musa wèa à pì: Né fíti gbẽ zõkõ. Óni gé ó pínkime kũ ó négõgbẽnɔ kũ ó nénɔgbẽnɔ kũ ó sãnɔ kũ ó blènɔ kũ ó zùnɔ, zaakũ Dikiri dikpen óten gé ke.

¹⁰ Akũ à pìnne: Tó ma á gbáɛ kũ á nɔgbẽnɔ kũ á nénɔ á pínki, ásarumɛ, Dikiri á bo! À laakari ke! Áten wete à fẽ kũmaomɛ.

¹¹ Oi! Á gõgbẽnɔ mé oni gé donyĩ ke Dikirine, zaakũ len a gbèka le. Akũ ò pèmma Firi'auna aɛ.

¹² Dikiri pì Musanɛ: Ñ n ɔ ɔ Misila bùsula, kwano ni ká ò sè kũ lá kũ ò bùte legũgbɛɛ gberanɔ ble pínki.

¹³ Kũ Musa a gòo dõ Misilala, Dikiri bò kũ ñao ifáboki kpa, àten pá bùsuu pìia fãnantẽ kũ gwãanio zɛnaa sari. Kũ gu dõ, ifáboki ña pìi sù kũ kwano.

14 Akū kwa pìno sù ò dà Misila bùsula pínki. Ní dasi de a yá pónla, a taka ni ke ziki doro.

15 Ò dà zítela gu sında pínki, akū zíte sira kù. Ò sè kù lánò kù líne kù ò bò legūgbεε gberano blè pínki. Sèε kù láo kú Misila bùsun doro.

16 Gwe gònò Firi'auna Musa kù Harunao sisi à pì: Ma durunna kè Dikiri á Ludanε kù ákōnò.

17 À sùru gèn do dí kemεne kù ma durunnao, à kúte kemεne Dikiri á Ludanε à gaga dí kēma.

18 Kù à bò Firi'auna kīnaa, à kúte kè Dikirinε.

19 Akū Dikiri bò kù ĩa gbānao ifálete kpa, à sù à kwanò sète à kà Isira Tēran. Bee kwa mèn do dí gō Misila doro.

20 Ama Dikiri Firi'auna kùu kè gbāna, akū à gì Isarailanò gbarεi.

Gusira dana Misilala

21 Dikiri pì Musanε: Nò sé musu, gusira kù oni fō ò ò kea ni da Misilala.

22 Kù Musa a ò dō musu, akū gusira níkiniki dà Misila gu sında pínkia ari gōrò aakō.

23 Òdi kō ero, gbēke dí bo a gbènlo ari gōrò aakō pìia. Ama gupura kú gu kù Isarailanòn kun pínki.

24 Akū Firi'auna Musa sisi à pì: À gé donyĩ ke Dikirinε kù á nōgbēnò kù á nēnò á pínki, ama à á sānò kù á blènò kù á zùnò tó.

25 Musa pì: Nò tó ògō ó sa'oponò kù sa'opo kù òdi ká tén à té kùnò kūna, de ò le ò Dikiri ó Luda gbagbao.

26 Séto ò gé kù ó pókādenò, bee mèn do ni gōro, zaakū n tén óni sa'oponò bon ò Dikiri ó Luda gbagbao. De ò kpé ò ká gwe, ó dō pó kù óni sé, ò sa ooa gīaro.

27 Dikiri Firi'auna kùgbãna kù, akū adi we à n̄ gbarero.

28 Firi'auna pì Musane: Ñ gomene gwe! Ñsun tó ó wé ke pla doro. Zī kù ó wé kè pla, n game.

29 Akū Musa pì: Lákū n ò nà, óni kō e doro.

11

Misila daudunᵒ gagana yā

1 À sù à lè Dikiri gīnake à pì Musane: Mani wari ᵒ Firi'aunaa kù Misila bùsuuo gēn do ᵒ, ani gbasà à á gbare. Tó àteni á gbare, ani péáwame!

2 Ñ o gbēᵒne n̄ baadi gᵒgbē kù ᵒgbēo andurufu pónᵒ kù wura pónᵒ gbeka á Misila gbēdakea.

3 Mani tó Isarailanᵒ ke kù Misilanᵒo nna. Musa sᵒ, àdigᵒ bèere vī Misila gūn Firi'auna ibanᵒne kù a gbēᵒ.

4 Akū Musa pì Firi'aunane: Dikiri pì, gwāani lizāndo áni vī Misila bùsula,

5 Misila daudunᵒ ni gaga n̄ pínki sēna zaa Firi'auna kù à vutena kpataa néa ari à gēe pé ᵒgbē zikeri kù òdi wisi lónᵒ néa kù pókade né sà káakunᵒ n̄ pínki.

6 Oni wēnda ó gbãna ᵒ Misila gu sīnda pínkia, a taka dí ke yāro, ani ke ziki doro.

7 Ama Isarailanᵒ té bee gbē ni won ke bisāsiri ke pókadearo, de ᵒgᵒ dᵒ kù Dikiri Misilanᵒ dᵒkᵒne kù Isarailanᵒ yāi.

8 N ìba dínᵒ ni su ma kīnaa n̄ pínki ò kútēmenē, ò pì mà gé kù ma gbēᵒo n̄ pínki. Abire gbera sà mani gé. Akū Musa bò Firi'auna kīnaa kù pᵒfē zᵒkᵒo.

9 Dikiri pì Musane yā: Firi'auna ni n yā maro, de ma daboyākenanᵒ ke dasi Misila.

10 Musa kũ Harunao daboyã pìnɔ kè Firi'auna are pínki, akũ Dikiri a kùgbãna kũ. À gì Isarailanɔ gbarei ò bo a bùsun.

12

Vĩnla dikpe

1 Dikiri yã ò Musane kũ Harunao Misila à pì:

2 Mɔ díkĩna nigɔ deáre mɔ káaku ũ wè kũ wèèo.

3 À o Isarailanɔne n pínki, mɔ díkĩna gɔɔ kuride zĩ ò sã bobo mèn dodo ɔn kũ ɔnnwo pínki.

4 Tó ɔn gbẽnɔ dasi dí ká ò sã mèn do só sɔro, ò kpàate kũ ɔn kũ ò kú kɔ sareo a gbẽnɔ lén, de a kpara sún gɔro yã.

5 À sãkaro ke blèkofĩni fíti kũ à mamberu vĩro bo.

6 Isarailanɔ pínki, baadi a pɔ gwa ari mɔ díkĩna gɔɔ gẽro donsaride zĩ. Ɔkɔsin oni de,

7 oni a aru má kpé kũ oni a nòbɔ sɔn kpélele gbĩnɔa, ɔplai kũ ɔzeo kũ musuo.

8 Gwãani dokɔnɔ pìia oni nòbɔɔ pì kpá téa, oni só kũ burodi futenasario kũ lá kyãkyãao.

9 Àsun só búsu ke fùfukɛnaro. À kpá téa kũ a m̀io kũ a gbánɔ kũ a pógũnnɔ.

10 Àsun tó gu dɔ a kparaaro. Tó a kpara gɔ, à a kpáta à té kũ.

11 Tó áten só, à asa dɔáwa à kyate kpá, á gò gɔ nana á ɔĩ. À só likalika, zaakũ Dikiri Vĩnla sa'opɔmɛ.

12 Gwãani pìia mani vĩ Misilala mà daudunɔ dede bùsuu pì gu pínkia kũ pókãde né sà káakunɔ n pínki, mani wé'i da Misila tánanɔa. Makũmɛ Dikiri ũ.

13 Aru pì nigõ de sèeda ũ kpé kũ á kú a gũnnɔwa. Tó maten ɔ t̃ Misilanoa, tó ma aru pìi è, mani gẽála, gaga pì ni á lero.

14 À gɔɔ pì dite ma dikpe gɔɔ ũ dɔngu yãì, àgõ dikpe pì ke kèotokõne ũ ari á buria.

Burodi Futenasari dikpe

15 Gɔɔ suppla gũn à burodi futenasari só. A gɔɔ káaku zĩ à lùbene kũ à kú á kpé gũnnɔ kóte, zaakũ gbẽ kũ à pófutena sò gɔɔ suppla pìi gũn, oni a bo Isarailano té ò a demɛ.

16 A gɔɔ káaku zĩ kũ a gɔɔ suppladeo à k̃ kakara à donyĩ kemene. Àsun zĩ ke ke gɔɔ kùnnaro, sé pòblekena gbẽ sinda pínkinɛ baasiro, a lén gwe.

17 À Burodi Futenasari dikpe ke, zaakũ zĩ birean ma á bóte Misila lán zĩkarino bà. Á burino gõ dikpe pì ke kèotokõne ũ.

18 Mɔ káaku gɔɔ gẽro donsaride zĩ ɔkɔsi, àgõ burodi futenasari só ari a gɔɔ baro awɛedode zĩ ɔkɔsi.

19 Gɔɔ suppla gũn lùbene sún gõ kú á bearo, zaakũ gbẽ kũ à pófutena sò, gbẽ z̃tɔɔn yòo, beden yòo, oni a bo Isarailano té ò a demɛ.

20 Àsun pófutena só gɔɔ p̃iario. Gu kũ á kun pínki, àgõ burodi futenasari só.

Vĩnla dikpe káaku

21 Musa Isaraila gbẽ z̃k̃nɔ s̃isi ní pínki à p̃inne: À gé à á ɔn sã kũ à de Vĩnla dikpekepe ũ.

22 À s̃èsvlã sé à z̃s aru kũ à kú ta gũnwa à máma á kpélele gb̃nɔa, ɔplai kũ ɔzeo kũ a musuo. Á gbẽke sún bo bàairo ari gu dɔ.

23 Tó Dikiri ten pã bùsula àten Misilano dède, tó à aru è kpélele gb̃nɔa, ani g̃ealamε. Ani tó gb̃d̃d̃eri g̃éái à á d̃d̃ero.

24 Ák̃nɔ kũ á burino àg̃ɔ yã pì kũna k̃etok̃ne ũ ari á buria.

25 Tó a g̃e bùsu kũ Dikiri ni á gban lákũ à a lé s̃àre nà, àg̃ɔ donyĩyã pì kũna.

26 Tó á ñnɔ donyĩyã pli m̃i gb̃ekaáwa,

27 à õne kũ Vĩnla sa kũ òdi o Dikiriaamε, zaakũ kũ à Misilano d̃d̃e, à g̃è ó Isarailano kp̃éla, adi ó d̃d̃ero. Akũ gb̃enɔ k̃ute ò donyĩ k̃e Dikirinε.

28 Kũ ò tà, ò k̃e lákũ Dikiri ò Musa kũ Harunaone nà.

Misila daudunɔ gaganaa

29 Gwãani lizãndo Dikiri Misila daudunɔ d̃d̃e ñ pínki, s̃ena zaa Firi'auna kũ à vutena kpataa néa ari à g̃e pé purusunano ñnɔa kũ pókade né sà káakunɔ ñ pínki.

30 Firi'auna f̃ute gwãani kũ a ìbano kũ Misilano ñ pínki, akũ w̃enda ó dà Misilala, zaakũ on ke kun g̃e sariro.

31 Gwãanin Firi'auna Musa kũ Harunao s̃isi à p̃inne: À fute kũ Isarailano à b̃ote ma gb̃enɔ té. À gé donyĩ ke Dikirinε lákũ a ò nà.

32 À á bl̃enɔ kũ á s̃anɔ kũ á z̃unɔ s̃éte lákũ a ò nà. À gé à sa mana om̃ene se.

33 Misilano nàkara gb̃e p̃inɔa ò b̃oteĩne ñ bùsun likalika, zaakũ ò p̃i: Òni gaga ó p̃inkimε.

34 Isarailano ñ flawadenano kà tano g̃un lùbenεε sari, ò ñ utano f̃if̃ia ò dàda ñ g̃an.

35 Ò k̃e lákũ Musa òñne nà, ò andurufu p̃onɔ kũ wura p̃onɔ kũ pókasanɔ gb̃eka Misilanoa.

³⁶ Dikiri tò Misilano ñ wé gwà, akū ò kpàmma. Leme ò Misilano póno sìmma le.

Isarailano dana zén

³⁷ Isarailano dà zén gèse, ò bòte kū Rameseo ò tà Suko. Gōgbēno gbēnon dúbu wàa aakōme, néno kū nōgbēno baasi.

³⁸ Buri zìtono tà kúnwo dasi do. Blèno kū sãno kū zùnnon dasi manamana.

³⁹ Ò burodi futenasari kè kū flawadena kū ò bòo Misilao. Ò kè lùbenee sari, zaakū ò pèmma Misila kãntome. Odi le ò pòble kè ò sè zãna ũro.

⁴⁰ Isarailano kunna Misila kè wè wàa pla kū baraakurio.

⁴¹ Wè wàa pla kū baraakurio pì papanaa gbera, dikpe pì zĩn Dikiri zìkarii pìno bòte Misila ñ pínki.

⁴² Gwãani pì kun Dikiri pò ũme. Isarailano nigō ibēne kea ari ñ buria, zaakū gwãani pìin Dikiri Isarailano bona Misila ibēne kè.

Vĩnla dikpe

⁴³ Dikiri pì Musane kū Harunao: Vĩnla yã kū ma diten dí. Buri zìto ke sún a nòbo sóro,

⁴⁴ ama zò kū a lù, tó a t̃ z̃na, ani só.

⁴⁵ Nibò ke gbasekeri sún sóro.

⁴⁶ À só kpén, àsun bo kū a nòboo p̃io bàairo. Àsun sã pì wá ke éro.

⁴⁷ Isarailano pínki gō dikpe pì ke.

⁴⁸ Tó gbē zìto kú á té, tó à ye à Vĩnla dikpe ke Dikirine, à a be gōgbēno t̃ z̃ ñ pínki à gō bede ũ gbasa à ke. Gyofrode sún sóro.

⁴⁹ Bede kū gbē zìto kú à kú kãáo, doka dokōno p̃ime.

⁵⁰ Akū Isarailanɔ kè lákū Dikiri ò Musanɛ nà kū Harunao n̄ pínki.

⁵¹ Zī birean Dikiri Isarailanɔ bòte Misila gâ kū gâao.

13

*Burodi Futenasari dikpe kú daudunɔ kpána Lu-
daaa*

¹ Dikiri yā ò Musanɛ à pì:

² Àgõ Isaraila daudunɔ kú pókāde né sà káakunɔ kpáma, zaakū ma pónɔme n̄ pínki.

³ Musa pì Isarailanɔnɛ: Á bona Misila zòblen gɔɔ díkīna yā gõ dɔágu, zaakū Dikiri mé à á bòte Misila kú a ɔ gbānao. Àsun pófutena só gɔɔ pìiaro.

⁴ Áten bòte Misila gbārame mɔ káaku kū òdi pì Abibu gūn.

⁵ Dikiri lé sè á dizinɔnɛ à pì áni b̀usu kú à vī kú z'io din, kú Kanaanɔ kú Itinɔ kú Amɔrinɔ kú Ivinɔ kú Yebusinɔn kun kpááwa. Tó à tò a ka, à dikpe pì ke mɔ dín.

⁶ Àgõ burodi futenasari só ari gɔɔ suppla. A gɔɔ supplade pì zī nigõ deáre Dikiri dikpe gɔɔ ũ.

⁷ Àgõ burodi futenasari só ari gɔɔ suppla pì papa. Pófutena ke l̀ubenɛ ke s̀ungõ kú ɔn ke gūn á b̀usunlo.

⁸ Zī p̀ia àgõ o á négõgbēnɔnɛ áten ke le yā kú Dikiri kèáre kú à á bòte Misila yāime.

⁹ Dikpe pì nigõ deáre s̀eda ũ lán pó dana ɔaa bà, ke lán dɔngu pó yīna mì'areaa bà, de Dikiri doka gõ kú á lén, zaakū àkū mé à á bòte Misila kú a ɔ gbānao.

¹⁰ Àgõ dokayā pì ke a gɔɔa wè kú wèeo.

11 Tó Dikiri tò a ka Kanaanɔ̀ bùsun, akū à kpàáwa lákū à a lé sèáre nà kū á dizinɔ̀,

12 àgɔ̀ á daudunɔ̀ kpáa ń pínki. Á pókáde né sà káakunɔ̀ dìgɔ̀ de a pó ṹ ń pínki.

13 Àgɔ̀ á zaaki né sà káaku tɔ̀rɔma bo kū sãneo. Tó ádi boro, à a waka fĩ. Àgɔ̀ á daudunɔ̀ tɔ̀rɔma bo ń pínki.

14 Tó á négɔ̀gbẽnɔ̀ á lá a mii zia ò pì, bó yãn gwee, à piñne Dikiri á bóte zòblen Misila yã kū a ɔ̀ gbãnao yãime.

15 Kū Firi'auna kùgbãna kè à gí ó gbareí, akū Dikiri Misila daudunɔ̀ dède ń pínki kū pókáde né sà káakunɔ̀ ń pínki. A yã mé à tò odì sa oa kū pókáde né sà káakunɔ̀ pínki, odì ó daudunɔ̀ tɔ̀rɔma bo.

16 Adikĩna nigɔ̀ de sèeda ṹ lán pó dana ó ɔaa bà ke pó yĩna ó mi'areaa bà, zaakū Dikiri mé à ó bóte Misila kū a ɔ̀ gbãnao.

Isarailanɔ̀ bona Misila

17 Kū Firi'auna Isarailanɔ̀ gbàre, Luda dí bo kũńwo Filisitini bùsu zé kparo, bee kū a kãnikéo, zaakū à pì: Tó ò fùteńyĩ kū zĩio, oni ò n̄e lite ò era Misila.

18 Luda pã zé piine, akū à gbáranna zé sè kũńwo Isira Tẽra kpa. Isarailanɔ̀ b̄te Misila ò ń zĩkabɔ̀nɔ̀ kũna.

19 Musa Yusufu wánɔ̀ sè àten táo, zaakū Yusufu tò Isarailanɔ̀ lé sèare yã à pì, tó Luda sù ń bo, oni a wánɔ̀ sète ò boo gwe.

20 Kū ò bò Suko, ò gèe ò bùraa kàte gbáranna léa zaa Etamu.

21 Dikiri dìgõ doñne are téluku gūn fānantē de àgõ zé moñne. Gwāani sō àdigõ doñne are ténene gūn, de àgõ gu puñne ògõ táa o fānantē kū gwāanio.

22 Téluku pìi dì go ñ are fānantēro, ténene pìi dì go ñ are gwāaniro.

14

Misilanɔ pɛtɛna Isarailanɔi

1 Dikiri pì Musane:

2 Ñ o Isarailanɔne ò lite ò gé bùra káte Pi'airo sare Migidolu kū ísiraɔ dagura, areɔkɔana kū Baali Zefɔ. À bùra káte ísira sare gwe.

3 Firi'auna nigõ da a sáte, gbáranna á kúkūme.

4 Mani a kùgbāna kū, ani pétéái, mani tó bo Firi'auna kū a zìkarinɔ yā sabai, Misilanɔ nigõ dõ kū makūme Dikiri ũ. Akū Isarailanɔ kè le.

5 Kū ò ò Misilanɔ kína Firi'aunane gbē pìnɔ bàa lè, akū àpii kū a íbanɔ nèse lite Isarailanɔ yā musu ò pì: Bón o kè, akū o tò ò bò zòblenawerenn?

6 Akū Firi'auna gó dò a sōne à a zìkarinɔ kàkara.

7 À sōgo mananɔ sè mèn wàa aakõ kū Misila sōgonɔ pínki kū zìkari gbē zòkɔnɔo ká ñ gūn.

8 Dikiri Misilanɔ kína Firi'auna kùgbāna kù, akū à pète Isaraila kū òten bote kū swègbānaonɔi.

9 Akū Misilanɔ pèteñyĩ kū Firi'auna sōnɔ kū a sōgonɔ kū a sōdenɔ kū a zìkarinɔ ñ pínki, akū òten su ñ le ñ bùran ísira sare kāni kū Pi'airoo areɔkɔana kū Baali Zefɔ.

10 Kū Firi'auna kà kāni, Isarailanɔ wé sè, akū ò Misilanɔ è té ñ kpɛ. Vĩna ñ kū manamana, akū ò wiki lè Dikiria.

11 Ò pì Musane: Miranɔn kú Misilanloo? Bó yā mé à tò n su kúoo gbárannan la ò gagaa? À kè dera n bo kúoo Misilai?

12 Asa o ònne Misila ò pì n ó tó tene ò zò ble Misilanone! Zòblennena manawere de gagana gbáranna díla.

13 Musa pínne: Àsun tó vīna á kuro. À ze tene áni e lākū Dikiri ni á sura ba nà gbāra, zaakū Misila kū áteni n e gbāra dínɔ, áni n e ziki doro.

14 Dikiri mé ani zì kááre. Àgō yītēna kítikiti dé!

Isarailanɔ bikūna Isira Tērala

15 Dikiri Musa là à pì: Bó wikin nten lémaa? N o gbēnne ò fute ò bo kū táo.

16 N n gò do ísiralá à zòkōre, de Isarailanɔ le ò gēte a dagura gukoria.

17 Makū, mani Misilanɔ kùgbāna kū, oni gēn n gbera, mani tó bo Firi'auna kū a zìkarinɔ kū a sōgonɔ kū a sōdenɔ yā sabai.

18 Tó ma tó bò Firi'auna kū a sōgonɔ kū a sōdenɔ yā sabai, Misilanɔ nigō dō sà kū makūme Dikiri ũ.

19 Luda Malaika kū à do Isarailanone are era à gēe n kpe kpa, akū téluku kū à kú n are era à gēe n kpe do

20 mókōnɔ kū Misilanɔ dagura. Téluku pì gu pù Isarailanone à gusira kpà Misilanone, akū n gbēke dí le à nà a dakei gwāani kùaro.

21 Kū Musa a do ísiralá, akū Dikiri bò kū ĩa gbānao ifāboki kpa. À kàka ari gu gēe a dōo à ísira lè à kpàatekōre, akū gukori bò. Kū í zòkōre,

22 akū Isarailanɔ taa ò gukoria ò bikù. Í bīni bò n oplai kū ɔzeo.

23 Akū Misilanɔ pèteńyĩ. Firi'auna sɔnɔ kū a sɔgonɔ kū a sɔdenɔ pínki té ń kpe ísira gūn.

24 Gudɔnaao Dikiri Misila zìkarinɔ gwà zaa ténene gūn, akū à tò ò likara.

25 À tò ń sɔgonɔ vlè, à tò ń táa'onaa kè zĩ'ũ, akū ò pì: Ò bàa lé Isarailanɔne, zaakū Dikiri ten zì káńne kũoomɛ.

26 Dikiri pì Musane: Ñ n ɔ dɔ ísiralá, í ni da Misilanɔla kū ń sɔgonɔ kū ń sɔdenɔ.

27 Akū Musa a ɔ dɔ ísiralá, akū í ten su a gbèn gudɔnaao. Lákū í ten su nà, akū Misilanɔ bàa sɔ ò ye ò bɔte. Gwen Dikiri tò ísira dàńlan.

28 Í sù a dà sɔgonɔla kū sɔdenɔ kū Firi'auna zìkari kū ò gè ísira gūn Isarailanɔ gberanɔ ń pínki. ń gbēke dí boro, bee mèn do.

29 Isarailanɔ sɔ ò táa ò í dagura gu koriamɛ. Í bĩni bò ń ɔplai kū ɔzeo.

30 Zĩ birean Dikiri Isarailanɔ sɔ Misilanɔa, akū Isarailanɔ Misila pìnɔ gènɔ è ísira bara.

31 Kū Isarailanɔ Dikiri gbāna zɔkɔ kū à mò Misi-
lanɔne è, ò vīna kènɛ, akū ò a náani kè kū a zòbleri
Musao.

15

Isarailanɔ lèe

1 Akū Musa kū Isarailanɔ ń pínki lè dí sɔ Dikirine ò pì:

Mani lè sí Dikirine, zaakū a tó bona,
à sɔdenɔ kū ń sɔnɔ kà ísiran.

2 Dikiri mé à ma gbāna ũ, mani a táaki lé,
àkū mé à ma sura bà.

Àkūme ma Luda ũ, mani a tó kpá.

Àkūme ma de Luda ũ, mani a tó sé lei.

³ Dikiri bi zìkariime, a tón Dikiri.

⁴ À Firi'auna sōgonɔ kũ a zìkarinɔ kà Ísiran,
à zìkari gbě zōkōnɔ vlè Isira Tēran.

⁵ Í lòkotoo pìi dàńla,
ò kpàte zīte lán gbèe bà.

⁶ Dikiri, n ɔplan gbāna kun kũ zōkōkeo,
Dikiri, n n ibereɔ kàkate kũ n ɔplao.

⁷ N n zāngurinɔ nè n gakuri zōkōɔ gūn,
n pɔ fè n n náte lán sèe bà.

⁸ N pó bò n yīn, akū í zōkōre,
à gò zena lán bīni bà,
Ísira ì ari a guragura.

⁹ Ó ibere pìnɔ pì,
oni pétewáí ò ó leme,
oni ó pónɔ séte lákū ò yei nà,
oni n fēnedanɔ bo ò ó dedeo.

¹⁰ N n lé'ía vù, akū Ísira dàńla,
ò kpàte lán darumaa bà í zōkōɔ pìn.

¹¹ Dikiri, tānanɔ té a kpate mé à de lán n bàa?
Dín oni lekōa kūnwoo?
Yābonsarekeri, n zōkōke adona,
n gakuri naasi vī.

¹² N n ɔpla pòro, akū zīte n mómɔ.

¹³ Ókōnɔ kũ n ó bó zòblennɔ
īni dowerɔ are n gbēke gūn,
īni gé kūoo n būsun kũ n gbānao.

¹⁴ Tó burinɔ mà, oni lukaluka,
í wāna ni ká Filisitini būsudenɔ pɔa.

¹⁵ Edomunɔ kínanɔ ni vīna ke,
swè ni kē Mɔabu don'arēdenɔn,
Kanaanɔ būsudenɔ mè ni yó n pínki.

16 Vĩna zõkõ ni nĩ kũ, swè ni kěńgu,
oni gõ kítikiti lán gbèè bà
n gbāna zõkõ yāi Dikiri,
ari ókõnõ kũ n ó sé n pó ũnõ ni gēte.

17 Dikiri, ĩni gé kũoo kpi kũ n sè n pó ũ kĩnaa,
ĩni ó zĩni péte gu kũ n ðite n vuteki ũn,
n kúki kũ n kèke n zĩdanee pìi.

18 Dikiri nigõ kí ble gɔɔ sĩnda pínkime.

19 Kũ Firi'auna sõnõ kũ a sõgonõ kũ a sõdenõ gē
ísira gũn, akũ Dikiri sù kũ ío à dàńla, ama Isarailanõ
táa ò gukoria ísira pìi gũn.

20 Akũ annabi Miriamu, Haruna dāre, a sègēe sè,
akũ nɔgbēnõ bò ò téi nĩ pínki, òten sègē pá òten ũ wā.

21 Miriamu lèe sìnne à pì:

À lè sí Dikirine, zaakũ a tó bona,
à sõdenõ kũ nĩ sõnõ kà ísiran.

Í kyàkyāa

22 Musa dà zén kũ Isarailanõ, ò kèkõa kũ Isira
Tērao ò gē Suru gbárannan. Ó táa ò gɔɔ aakõ
gbáranna pìn odi í ero.

23 Kũ ò kà gu kũ òdi pi Mara, odi fõ ò a í mìro kũ à
kè kyàkyā yāi. A yā mé à tò ò tó kpà gu pìine Mara.

24 Akũ gbēnõ zuka kà Musai ò pì: Bón óni mii?

25 Musa wiki lè Dikiria, akũ Dikiri lí m̀nne. Kũ
Musa lí pìi zù ín, akũ í pìi kè nna. Gwen Dikiri yā
ðiteńne kũ dokao à nĩ yõ à nĩ gwá

26 à pì: Tó a laakaríi d̀ makũ Dikiri á Luda yāa
átēn yā kũ má yei ke, tó a yā kũ ma ðitenõ mà,
akũ á ma dokanõ kũna pínki, mani gyā kũ ma kà
Misilanõn ke kááguro, zaakũ makũme Dikiri kũ àdi
á gba aafia ũ.

27 Abire gbera ò kà Elimu, gu kũ ísɛboki mèn kuri awɛɛplanɔn kun kũ domina lí mèn baaakɔ akurinɔ. Akũ ò bùraa kàte í pìi sare gwe.

16

Mana kũ kpekperewinɔ

1 Isarailanɔ fùte Elimu ñ pínki, akũ ò kà Sini gbáranna kũ à kú Elimu kũ Sinaio dagura ñ bona Misila mɔ plade gũn gɔɔ gẽrode zĩ.

2 Akũ ò zuka kà Musai kũ Harunao gbárannan gwe ñ pínki

3 ò pínne: Bó yá mé à tò Dikiri dí ó dede Misilaroo? Gwe odì vute ó pɔ ble kũ nɔbɔɔ ari ò kã, akũ a su kũoo gbárannan kũ à ó dede kũ nàao.

4 Dikiri pì Musane: Bona musu mani pɔble fáare. Gbɛnɔ ni bɔte ò gɔɔ do pɔ sɛte lákũ gu dīgɔ dɔ nà ñ blena lén, de mà ñ yɔ mà gwa tó ò ma doka kũna.

5 Gɔɔ suddode zĩ gɔɔ pla pɔn oni sɛte ò a pɔble ke.

6 Akũ Musa kũ Harunao pínne ñ pínki: Okɔsiala áni dɔ kũ Dikiri mé à á bɔte Misila,

7 zia kɔnkɔ áni Dikiri gakuri e. À zuka kũ a kàai mà. Bón ó ũ kũ áni gbasaa zuka kàwáii?

8 Musa era à pì: Dikiri ni á gba nɔbɔɔ à só okɔsiala, zia kɔnkɔ ani pɔble kpááwa á blena lén, kũ à zuka kũ á kàai mà yá. Póken ó ũro. Adi ke ókɔnɔ a zuka kàwáiro, Dikirime.

9 Akũ Musa pì Harunanɛ: N̄ o Isarailanɔne ñ pínki ò na Dikiri, zaakũ à ñ zukakanaa mà.

10 Kũ Haruna ten yá oñne, ò are dɔ gbáranna kpa, akũ ò è Dikiri gakuri bò à sùmma téluku gũn.

11 Akũ Dikiri yá ò Musane à pì:

12 Ma Isarailanɔ zukakanaa mà. Ñ oñne ɔkɔsiala oni nòbɔ só, zia kɔnkɔ oni pɔ ble ò kã, oni dɔ kũ makũme Dikiri n̄ Luda ũ.

13 Ɔkɔsi kpekperewinɔ sù ò dà n̄ bùrala. Kũ gu dɔ plí kpà à likañyĩ.

14 Kũ plí kè, akũ pɔ gò katena zĩte púu ketekete lán pɔ koto bà.

15 Kũ Isarailanɔ è, ò pikɔne: Bón dí? Zaakũ odi dɔ pɔ kũ à de a ũro. Musa pìñne: Pɔ kũ Dikiri kpàáwa à blen gwe.

16 Yã kũ Dikiri d̄iteáren dí: Á baadi sète a blena lén. À sète á baadi zaka lé dodo á ɔndenɔ dasi lén.

17 Isarailanɔ kè le. Ò sète, gbɛkenɔ pɔ zɔkɔ, gbɛkenɔ pɔ fíti.

18 Kũ ò zakaa dàn, gbɛ kũ à sète zɔkɔ pɔ dí dialaro, gbɛ kũ à sète fíti pɔ dí kĩaaro.

19 Musa pìñne: Gbɛke sún a kpara tó ari gudɔoro.

20 Gbɛkenɔ dí Musa yã maro, ò a kpara tò ari gu dɔ, akũ à kòkɔ kà à v̄à, akũ Musa pɔ fè gbɛ pìnɔi.

21 Lákũ gu d̄igɔ dɔ nà baadi d̄i sète a blena lén. Tó ifántè gbà, pɔ kũ à gò zĩte d̄i yóm̄e.

22 Gɔrɔ suddode zĩ ò pɔble sète leu pla, baadi zaka lé plapla. Akũ n̄ gbɛ zɔkɔnɔ gèe ò ò Musane n̄ pínki.

23 À pìñne: Len Dikiri d̄ite le. Zia bi kámmabogɔrɔ zĩme, Dikiri gɔrɔme. À pɔ kũ á ye à kpá téa kpá téa. À pɔ kũ á ye à disa disa, à a kpara kũ à gò dite ari gu dɔ.

24 Ò d̄ite ari gu dɔ lákũ Musa ò nà. Adikũ dí v̄aro adi kòkɔ káro.

25 Akũ Musa pìñne: À ble gbãra, zaakũ kámmabogɔrɔ zĩme, áni e gukea gbãraro.

²⁶ Àgõ sète ari gɔɔ suddo. A gɔɔ supplade bi kámmabogɔɔ zĩme, anigõ kun zĩ kũaro.

²⁷ Gɔɔ supplade zĩ gbẽkeno bõ ò gèe sète, akũ odi lero.

²⁸ Akũ Dikiri pì Musane: Ánigõ kú kũ doka kũ ma ditenõ manaa sario ari bɔremee?

²⁹ Àgõ dõ kũ makũ Dikiri ma kámmabogɔɔ ditekare. A yã mé à tò gɔɔ suddode zĩ madì gɔɔ pla pòble kpááwa. Baadi gõ kú a gbèn, gbẽke sún bo gu kũ à kun gɔɔ supplade pì zĩro.

³⁰ Akũ ò kámma bõ gɔɔ supplade zĩ.

³¹ Isarailano tó kpà pòble pìine mana. À de lán pòwe pura keteketeno bàme. A í nna lán kàra zóde bà.

³² Musa pì: Yã kũ Dikiri diten dí: Ò mana zaka lé do dite ó burinone, de ò pòble kũ à kpàwá o blè gbárannan ó bona Misila gbera e se.

³³ Akũ Musa pì Harunane: Ì lo sé ò mana zaka lé do kán ò dite Dikiri are, de àgõ ditena ó burinone.

³⁴ Akũ Haruna dite gbè anlonõ sare de àgõ ditena lákũ Dikiri ò Musane nà.

³⁵ Isarailano mana blè wè bupla ari ò gèe ò kào bũsu kũ gbẽnõn kún. Ò mana pì blè ari ò gèe ò kào Kanaanõ bũsu léa.

³⁶ Zaka lé do bi lita plame.

17

Í bona gbèn

(Nar 20:2-13)

¹ Isarailano fùte Sini gbárannan í pínki, òten bùra kátekate lákũ Dikiri ònne nà, akũ ò gèe ò bùraa kàte Refidimu. Odi í le ò mì gwero,

² akū ò zuka kà Musai ò pì: Ñ ó gba í ò mi. À pìñne: Bóyái átèn lèkpakõana ke kũmaoo? A kè dera átèn Dikiri lé à gwaa?

³ Kū ími teni ní de, akū ò zuka kà Musai ò pì: Bóyái n bo kũoo Misilai? Ñ ye ími ó de kũ ó néno kũ ó pókādenon yá?

⁴ Akū Musa wiki lè Dikiria à pì: Deran mani ke kũ gbē pìno nàa? À gò fíti kũ oni ma pápa kũ gbèeo ò ma de.

⁵ Dikiri pìne: Ñ Isaraila gbē zōkōno sète à do gbē pìno ne are. Ñ n gò kũ n Nili lèo sé do.

⁶ Mani ze n are Orebu gbèsi sare gwe. Ñ gbèsi pì lé, í ni bo de ò mi. Akū Musa kè le Isaraila gbē zōkōno wára.

⁷ Akū ò tó kpà gu pìine Masa, zaakū gwen ò Dikiri lèn ò gwà ò pì: Dikiri kú kũoomε gwe yá? Ò tó kpàne Meriba do, kũ Isarailano zuka kà gwe yái.

Zìkana kũ Amalekin

⁸ Amalekinò sù zì ká kũ Isarailano Refidimu.

⁹ Akū Musa pì Yosuanε: Ñ gbēno sé ó té à gé zì ká kũ Amalekinò. Zia manigõ zena sīsī dí mìsõntea kũ Luda gòoo kũna.

¹⁰ Yosua kè lákū Musa òne nà, à gèe zì ká kũ Amalekinò. Akū Musa kũ Harunao kũ Uruo dìdì sīsī pì mìsõntea.

¹¹ Tó Musa a no sè, Isarailano dìgõ zì ble Amalekinòame, ama tó à a no dìte sō, Amalekinò dìgõ zì ble Isarailano.

¹² Kū Musa no wà, ò gbèe sè ò dìte a gbáru à vùtea, akū Haruna kũ Uruo a no kũkũna, gbē do oplai,

gbē do ɔzei, akū a ɔno gò zena ari ifāntē gèe à gèò kpén.

¹³ Akū Yɔsua zìi blè Amalekinɔa à ní dede kū fēnɛdao.

¹⁴ Dikiri pì Musanɛ: Ñ adikīna kē takada gūn de àgō de dɔngu pó ũ ñ o Yɔsuanɛ, zaakū mani Amalekinɔ buri bo andunia gūn ní pínki.

¹⁵ Musa gbagbaki bò, akū à tó kpàne Dikirime ma tuta ũ

¹⁶ à pì: Ma ɔ sè Dikiri kpata kpa. Dikiri nigō zì ká kù Amalekinɔ gɔɔ sīnda pínki.

18

Yetoro gena Musa gwa

¹ Musa anzure Yetoro, Midiā sa'ori, yā kù Luda kè Musanɛ kù a gbē Isarailanɔ mà, lākū Dikiri ní bóte Misila nà.

² À sù à lè Musa gīnake à a nanɔ Zipora zì be

³ kù a négōgbē mèn planɔ. A do tón Gesomu, zaakū Musa pì gbē zītɔn a ũ dakenɔ busun.

⁴ A do tón Elieza, zaakū Musa pì a de Luda a faaba kè à a bo Firi'auna fēnɛda léi.

⁵ Akū Yetoro fùte àten su Musa kīnaa kù a néno kù a nanɔ gu kù à bura kàten Luda kpi sare gbárannan.

⁶ À légbāzā kè Musanɛ à pì: Maten su n kīnaa kù n nanɔ kù n né mèn planɔ.

⁷ Musa bò à gèe à dà a anzure à kùte à lé pèa. Ò kō aafiaa gbèka, akū ò gè kpén.

⁸ Musa yā kù Dikiri kè Firi'aunanɛ kù Misilanɔ Isarailanɔ yāi bàbanɛ pínki kù wari kù à ní lé zé gūnnɔ pínki kù lākū Dikiri ní bó nàò.

9 Yetoro pɔ kè nna yã mana kũ Dikiri kè Isarailanɔnɛɛa pínki kũ lákũ à n bó Misilanɔ ɔĩ nàò.

10 Akũ à pì: Ò Dikiri sáabu kpá lákũ à á bó Firi'auna kũ Misilanɔ ɔĩ nà.

11 Má dè sà kũ Dikiri zòkò de tãnanɔla n pínki. Kũ Misilanɔ ãa dàáwa, à yã m̀òńɛ.

12 Akũ Yetoro sa'opɔ kũ òdi ká tén à té kũ ò Ludaa kũ sa'opɔ pãndenɔ dɔ. Akũ Haruna kũ Isaraila gbẽ zòkònɔ n pínki ò sù ò pó blè kãao Luda arɛ.

Yãgɔgɔrinɔ ditɛnaa

13 Kũ gu dè Musa vùtɛ àtɛn yã gɔgɔńɛ, ò katenai zaa kɔnkɔ ari ɔkɔsi.

14 Kũ Musa anzure yã kũ àtɛn kɛńɛ è pínki, akũ à a là à pì: Bón nten kɛ kũ gbẽ dínɔ lɛɛ? Bóyãi nten yãkpate kɛńɛ ndo, gbẽ sında pínki katenanyĩ zaa kɔnkɔ ari ɔkɔsii?

15 Musa wɛa à pì: Gbɛnɔ di su ma kĩnaa ò Luda pɔyenyĩna yã mamɛ.

16 Tó ò yãkete vĩ, òdi su ma kĩnaa mà yã pì gɔgɔńɛ mà Luda doka kũ à dítɛnɔ ońɛ.

17 Musa anzure pìnɛ: Yã kũ nten kɛ manaro.

18 Ìni kpasa, gbẽ kũ ò kú kũnwonɔ ni kpasa dɔ, zaakũ zĩ pì denla, ìni fɔ n kɛ ndoro.

19 N ma yã ma sà, mani lé damma, Luda nigɔ kú kũnwɔ. Ìnigɔ deńɛ yãgɔgɔri ũ, ìnigɔ gé kũ n yãnɔ Luda kĩnaa,

20 Ìnigɔ doka kũ Luda dítɛnɔ dańɛ, ìnigɔ zé kũ à de ò sé m̀òńɛ kũ yã kũ oni kenɔ.

21 N gbẽ laakaride náanide kũ ò Luda vĩna vĩ akũ òdi gusarɛgba síronɔ sé n té, n n dite gbɛnɔn wàa sɔsɔronɔ don'arɛdenɔ ũ kũ gbɛnɔn basɔsɔroo kũ gbɛnɔn bupla akurio kũ gbɛnɔn kurikurio,

²² de ògõ yã gõgõ gbẽ pìnɔnɛ gɔɔ sɪnda pínki. Oni su n kīnaa kũ yã zĩ'ũnɔ pínki, ama oni yã fítinnanɔ gõgõ n zĩda. Abire mé ani n aso lagonnɛ.

²³ Tó Dikiri wènnɛ, tó n kè lɛ, ĩni fuaro, gbẽ pìnɔ ni tá bɛ kũ laakarīio kpatena.

²⁴ Musa a anzure yã mà à kè lákũ à òare nà pínki.

²⁵ À gbẽ laakaridenɔ sè Isaraila burinɔ té pínki à n díte gbēnɔn wàa sɔsɔronɔ don'arɛdenɔ ũ kũ gbēnɔn basɔsɔroo kũ gbēnɔn bupla akurio kũ gbēnɔn kurikurio.

²⁶ Akũ òdigõ yã gõgõnɛ gɔɔ sɪnda pínki. Yã zĩ'ũn òdi suo Musa kīnaa, akũ òdi yã fítinnanɔ gõgõ n zĩda.

²⁷ Musa gɛɛ à zè a anzureenɛ, akũ à tà a bùsun.

19

Sinai kpi sare

¹ Isarailanɔ bona Misila mɔ aakõde gũn

² ò fùte Rɛfidimu. Kũ ò kà Sinai gbárannan, akũ ò bùraa kàte gwe Sinai kpi sare.

³ Musa dìdi à gèè Luda kīnaa kpi pìi musu, akũ Dikiri lé zùì à pì: N̄ yã dí o Yakubu buri Isarailanɔnɛ:

⁴ A è lákũ ma kè Misilanɔnɛ nà, lákũ ma á sé ma su kááo ma kīnaa, lákũ vāu dì a né sé a dɛmberɛɛa nà.

⁵ Tó a ma yã mà á ma bàka kunna kááo yã kũna tera sà, anigõ de ma gbẽ yenyĩdenɔ ũ buri sɪnda pínki té. Bee kũ andunia de ma pó ũ pínki,

⁶ ániḡ demɛnɛ kɪnanɔ kũ sa'orinɔ ũ, ma gbẽ kũ ò kú adonanɔ ũ. Yã kũ ĩni o Isarailanɔnɛn gwe.

⁷ Musa kìpa à gbẽ zõkõnɔ sisi, akũ à yã kũ Dikiri ònɛ bàbáñne pínki.

⁸ Gbēno wèa ní pínki ò pì: Yā kū Dikiri òwεε pínki óni κε. Akū Musa gèε à yā kū ò òo bàba Dikirine.

⁹ Dikiri pìne: Mani su n kīnaa túsukpe gègetee gūn, de gɔɔ kū maten yā onne, oni ma onigɔ n náani vī gɔɔ sīnda pínki. Akū Musa yā kū gbēno òo bàba Dikirine.

¹⁰ Akū Dikiri pìne: N̄ gé ní kīnaa n̄ onne ò gbà bo ní zīdane gbāra kū ziao, ò n̄ pókasanɔ pīpi.

¹¹ Ògɔ kú soru gūn ziando, zaakū a gɔɔ aakɔde zīn mani kipa mà zε Sinai kpì musu gbē sīnda pínki wára.

¹² N̄ zīte lé sèeda dañne kpi pìi pòɔ léa ari à likai pínki. N̄ onne ò laakari κε. Òsun didi kpi pìiaro. N̄ gbēke sún ɔ kea sero. Gbē kū à ɔ kèa, ò ade de.

¹³ Òsun ɔ ke adearo. Ò a pápa kū gbèεo ke ò a pápa kū kàao ò de. Pókāden yá, bisāsirin yá, à gāme. Tó ò mà ò kuru pè ò a yīsām pà, ò na kpi pīii.

¹⁴ Musa kipa kpi pìia à sù à gbēno lè à òñne ò gbà bo ní zīdane ò n̄ pókasanɔ pīpi.

¹⁵ À èra à pìñne: Àgɔ kú soru gūn gɔɔ aakɔde zī yāi. Àsun wúte kū nɔgbēoro.

¹⁶ Kū gu dò a gɔɔ aakɔde pìia, akū legū ten pūtā àten pí, akū legū sisi kpi musu. Kū ò kuru yīsāmpanaa mà, akū vīna gbē kū ò kú bùrannɔ kù n̄ pínki òten lukaluka.

¹⁷ Musa bò kūñwo bùran à gèε kūñwo Luda kīnaa, akū ò zè zīte kpi pìi sare.

¹⁸ Túsukpe dà Sinai kpila kū Dikiri kīpaa kū téo yāi. Túsukpe pìi fùte lán tāma túsukpe bà, akū kpi pì ten yīgāyīgā manamana.

¹⁹ Kuru yīsāmpana ten kara. Kū Musa yā ò, akū

Luda wèa legūpūtānaa gūn.

²⁰ Dikiri kipa à zè Sinai kpi m̀s̀ontea à Musa s̀isi, akū à didi à g̀e gwe.

²¹ Dikiri p̀ine: Ñ kipa ñ kpākē gbēñɔ, òsun vī gulɛzekila ò su ò ma gwaro, de ñ paridenɔ sún gagaro yāi.

²² Bee sa'ori kū òdi namainɔ, ò gb̃a bo ñ zīdane de m̀sun f̀nyīro yāi.

²³ Musa p̀i Dikirinɛ: Oni didiro, zaakū n kpākēwái n p̀i ò zīte lé s̀eda da kpi p̀i p̀ro léa à g̃ n p̀ó ũ.

²⁴ Akū Dikiri p̀ine: Ñ kipa ñ Haruna sé ñ su kāao, ama sa'orinɔ kū gb̃e kparanɔ sún vī bara ò su ma kīnaaro de m̀sun f̀nyīro yāi.

²⁵ Akū Musa k̀pa gb̃e p̀inɔ kīnaa à yā p̀i ò́ne.

20

Dokayā m̀en kurinɔ

¹ Luda yā d̀kīna ò p̀nki à p̀i:

² Makūme Dikiri á Luda ũ. Ma á bóte z̀blen Misila.

³ Àsung̃ dikiri ke vī ma gberaro.

⁴⁻⁵ Àsun p̀oke taka ke à kúte à donyī kenɛro, p̀ó kū à kú musu ke zīte ke í gūnn yá, zaakū makū Dikiri á Luda, ǹeseg̃bademe ma ũ. Madì gb̃e kū à yemaironɔ yā vāni wí ñ burinɔ musu ari à gé p̀é ñ s̀akpenɔa kū ñ nasionɔ.

⁶ Gb̃e kū ò yemai ò ma dokayānɔ kūnanɔ s̃, madìg̃ gb̃eke vī kūñwome ari ñ buria.

⁷ Àsun makū Dikiri á Luda t́ sí pāpāro, zaakū gb̃e kū à ma t́ sí pāpā mani t́ à bo pāro.

⁸ Àg̃ don kāmabog̃ro bi ma p̀ome.

9 Àgõ á bura zĩ kũ á zĩ sĩnda pínkiø ke gɔɔ suddo,
 10 a supplade gõ deáre kámmabogɔɔ ũ, zaakũ makũ Dikiri á Luda ma pómε. Àsun zĩ ke ke gɔɔ pì zĩro, ákõnɔ ke á négõgbẽ ke á nénõgbẽ ke á zĩkeri gõgbẽ ke nõgbẽ ke á pókáde ke nibɔ kũ à kú á bæa.

11 Zaakũ gɔɔ suddon ma musu kũ zĩteø kè kũ ísiraø kũ pó kũ ò kú n gũnnɔ pínki, akũ ma kámma bò a gɔɔ supplade zĩ. A yã mé à tò ma arubarikaa dà kámmabogɔɔ pìn ma dìte ma pó ũ.

12 Àgõ á de kũ á dao bèere dõ, de à gì ke bùsu kũ makũ Dikiri á Luda maten kpááwan.

13 Àsun gbẽ dero.

14 Àsun zina kero.

15 Àsun kpãni oro.

16 Àsun yã dí á gbẽdakearo.

17 Àsun á gbẽdake on ni dero. Àsun a nɔ ni dero ke a zĩkeri gõgbẽ ke nõgbẽ ke a zù ke a zaaki ke pó kũ à vĩnɔ pínki.

18 Gbẽ sĩnda pínki legüpütánaa mà kũ kuru yĩsámpanaaø, ò legüpinaa è kũ túsukpeø dɔ kpi musu, akũ vĩna n kũ òten lukaluka ò ze zà dire.

19 Ò pì Musane: Ñ yã owere n zĩda, óni ma. Ñsun tó Luda yã owero, de òsun gagarø yã.

20 Musa pìnnε: Àsun tó vĩna á kũro, zaakũ kũ à á yõ à gwa yãin à sù, de àgõ a vĩna vĩ akũsõ àsun durunna kero yã.

21 Ò ze zà dire, akũ Musa nà túsukpe gègetee pìii, gu kũ Luda kun pìn.

Dikiri gbagbaki yã

22 Akũ Dikiri pì Musane: Ñ yã dí o Isarailanone: A mà kũ á zĩdao lákũ ma yã òáre zaa musu nà.

23 Àsun tãna ke ke à namaro. Àsun andurufu ke wura pi tãnanɔ ũro.

24 À ma gbagbaki bo kũ ẽo à sa oa kũ sãno kũ zũno, sa'opɔ kũ òdi ká tén à té kũ kũ kennakũkõo sa'opɔo. Gu kũ ma dìteáre àgõ ma sísin, mani su á kĩnaa mà arubarika daágu.

25 Tó áteni ma gbagbaki pi bo kũ gbèeo, àsun bo kũ gbè anaaoro, zaakũ tó a gã pètea, a tò à gbãa lèn gwe.

26 Àsun ma gbagbaki bo à a didiki kero, de á pótompoke sún bo gbagbaki piaro yáí.

23

Yákɛna a zéa

1 Àsun òpi baaru kpáro. Àsun ze kũ gbẽ vãnio éke sèedade ũro.

2 Àsun té parii yãvãnikɛnaa gũnlo. Àsun ze kũ pario yákpate gũn à bo yãzede kpero.

3 Tó takaside yã nnaro, àsun ze kãaoro.

4 Tó n ibere zù ke a zaaki sàte akũsõ n kpakũ kãao, n a kũ n géone be.

5 Tó n n zãnguri zaaki è àten fu asoa, n kpái, nsun a tónlo.

6 Tó takaside yã nna, àsun bo a kpero.

7 À ke zà kũ manafikio. Àsun taarisaride ke gbẽ mana dero, zaakũ mani tó taaride bo pãro.

8 Àsun gusaregba síro, zaakũ gusaregba di tó wédeno vĩna kũme, akũsõ àdi gbẽ manano yã lite kpedangara.

9 Àsun bõasu wé tãro. Á bõasuke dõ, zaakũ bõasunon á ũ yã Misila.

10 Àgõ pó tã á buranɔa à keke ari wè suddo,

11 a wè suppladen à tó zĩte kámma bo à ãam pá, de á takasidenɔ le ò a zã kũ à bùte gwenɔ kɔnɔ we, nòbɔsɛntenɔ le ò a kpara só. À ke le dɔ kũ á geepi búo kũ á kùkpeo.

12 Àgõ zĩ ke ari gɔɔɔ suddo, a suppladen àgõ kámma bo, de á zùnɔ kũ á zaakinɔ le ò kámma bo, akũsõ á zòɔ kũ bòasunɔ ni le ò ãam pá.

13 Àgõ yã kũ ma òárenɔ kũna pínki. Àsun tãnanɔ tó síro. Òsun n̄ tó ma á lén sero.

Dikpe mèn aakõnɔ
(Bon 34:18-26)

14 Wè kũ wèeo àgõ su dikpe kemene gèn aakõ.

15 Àgõ Burodi Futenasari dikpe ke lákũ ma dìteáre nà, àgõ burodi futenasari só ari gɔɔɔ suppla mɔ kũ òdi pí Abibu gũn a gɔɔɔa, zaakũ mɔ píi gũnn a bɔten Misila. Gbêke sún su ma kĩnaa okoriro.

16 Àgõ Pókèna dikpe ke gɔɔɔ kũ a na pókènaaaa, à á burapɔ káakunɔ kpáma. Àgõ Pódufublena dikpe ke wè lakanaaaa, gɔɔɔ kũ a á burapɔnɔ kàkara pínki.

17 Wè kũ wèeo gèn aakõ á gõgbẽ sinda pínki su kɔkakarana ke makũ Dikiri á Luda are.

18 Àsun pófutena kpáma leele kũ sa'opɔ aruoro. Àsun dikpe sa'opɔ nísi dite gu dɔaro.

19 Àgõ gé ma Dikiri á Luda onn kũ á burapɔ káakunɔ. Àsun blène nòbɔ kuku kũ a da yõ'ioro.

Luda Malaika ni do a gbènne are

20 Mani malaika gbare à doáre are à á dākpa zén à ká kááo gu kũ ma kèken.

21 À laakari do a yāa à a yā ma. Àsun bo a kpero, zaakū ani sùru ke kǎáo á taari yā musuro kū ma tó kúa yāi.

22 Tó a a yā mà akūsō a yā kū ma òáre kè pínki, manigō de á iberenō iberε ūme, á weterinō weteri ũ.

23 Ma malaika pì ni doáre are à gé zeáre b̀usu kū Am̄rin̄n̄ kun kū Itin̄o kū Perizin̄o kū Kanaan̄o kū Ivin̄o kū Yebusin̄o, mani n̄ kakate.

24 Àsun kúte n̄ t̄anan̄ne à dońyĩro, àsun n̄ kena kero. À n̄ gboro à n̄ gb̄en̄o wíwi.

25 À do Dikiri á Ludai, ani arubarika daáre á p̀b̄len̄ kū á p̀minaao, ani gyān̄o k̄éáwa.

26 N̄ogb̄en̄o ni n̄ò b̄ote á b̀sunlo akūsō para nigō kunlo. Mani á w̄endi bà doáre kū m̀kakōanaao.

27 Mani v̄ina dada gb̄ε kū ò kú á aren̄oi, mani tó bídi ḡε buri kū a ka n̄ k̄inaan̄gu, mani tó á iberen̄o kpe liáre.

28 Mani z̄umant̄en̄o gbare á are ò ká Ivin̄ogu kū Kanaan̄o kū Itin̄o ò p̄m̄maáre.

29 Adi ke mani p̄m̄maáre w̄ε do ḡun̄ ḡon̄nlo, de b̀susu pì sún ḡō lákpe ũ n̄òb̄os̄ent̄en̄o daálaro yāi.

30 Manigō p̄m̄maáre busebuseme ari à ke dasi à ká à b̀usu sí.

31 Mani á b̀usu lé daáre zaa Isira T̄era léa ari Filisitinin̄o Isira léa, zaa gbáranna lén ari Yuflati léa. Mani b̀supiden̄o naáre á oĩ à p̄m̄ma.

32 Á bàka sún̄gō kú n̄ yān ke n̄ t̄anan̄o yānlo.

33 Àsun tó ògō kú á b̀sunlo, de òsun tó à durunna kemenero, zaakū tó a n̄ t̄anan̄o gbàgba, a tankute kpàkpa á z̄idaneme.

Luda bàka kunna kū Isarailanɔ sèedaa

¹ Dikiri pì Musanɛ: Mɔkɔn kū Harunao kū Nad-abuo kū Abiuo kū Isaraila gbɛ zɔkɔ gbɛnɔn baaakɔ akurinɔ, à didi kpia à mó ma kīnaa, à donyī kemene zaa zā.

² Mɔkɔmmɛ ĩni namai ndo, gbɛ kparanɔ sún su kãniro akūsɔ pari sún didi kũńwo kpi díkĩna musuro.

³ Musa gèè à yā kū Dikiri òo gbǎńne pínki kū dokayānɔ pínki. Ò wè lɛɛɛ n pínki ò pì: Yā kū Dikiri ò pínki óni ke.

⁴ Akū Musa yā kū Dikiri òo pìnɔ kè takada gūn pínki.

À fùte kɔnkɔkɔnkɔ à gbagbaki bò kpigereɛi, akū à gbèè pètepete mèn kuri awɛɛpla Isaraila buri mèn kuri awɛɛplanɔ pó ũ.

⁵ À Isaraila kefennanɔ zī kū zùsanɛnɔ, akū ò sa'opɔ kū òdi ká tén à té kū òo Dikiria kū sáabukpana sa'opɔnɔ.

⁶ Akū Musa zùu pìnɔ aru sì à kpàate leu pla. À a leu do dìte kū tao à a leu do àtɛ gbagbakia.

⁷ Akū à Dikiri bàka kunna kũńwo takada sè à a kyó kèńne. Akū ò pì: Yā kū Dikiri ò pínki óni ke óni mì natɛɛ.

⁸ Akū à aru pì sè à fǎńma à pì: Dikiri bàka kunna kǎáo arun gwe lákū a mà nà pínki.

⁹ Musa kū Harunao kū Nadabuo kū Abiuo kū Isaraila gbɛ zɔkɔ gbɛnɔn baaakɔ akurinɔ didi kpia.

¹⁰ Ò Isarailanɔ Luda è. Safia gbè gusara katena a gbá gēi, a í de búgu swáswa lán ludambɛ búgu bà.

¹¹ Luda dí yāke ke Isaraila gbǎnade pìnɔnero. Ò wé sìale, akū ò pó blè ò í mì.

Musa kunna Sinai kpi musu

¹² Dikiri pì Musanɛ: Ì didi kpia ò mó ma kīnaa ñgõ kú gwe. Mani gbè anlo kũ ma a dokayãñ kèãñ kpámma, de ò le ò dañɛ.

¹³ Akũ à fùtɛ kũ a kpàasi Yɔsuao, òtɛn gé didi Luda kpia.

¹⁴ Akũ Musa pì gbè zɔkɔñɔnɛ: Àgõ ó dā la, óni era ò su á kīnaa. Haruna kũ Uruo nigõ kú kááo. Tó gbèke yáke vī, à géo ñ kīnaa.

¹⁵ Akũ Musa didi kpi pìia. Túsukpɛ dà a mìsɔntɛla,

¹⁶ akũ Dikiri gakuri kipa Sinai kpi pìia. Túsukpɛ pì daala le ari gɔrɔ suddo, a gɔrɔ suppladen Dikiri lé zù Musai zaa túsukpɛ pìi gũn.

¹⁷ Isarailanɔ Dikiri gakuri è lán té kũ àdi ñ ble bà kpi pìi mìsɔntɛa.

¹⁸ Akũ Musa gè téluku pìi gũn à èra à didi kpi pìia. À kú gwe ari gɔrɔ bupla fānantɛ kũ gwāanio.

31

Luda bizakuta

¹ Dikiri yā ò Musanɛ à pì:

² Ì ma! Ma Uri né Bezalɛli, Uru daikore, Yuda buri sè.

³ Ma tò ma Nini kúa, akũ à òndõ kũ gonio kũ dōnaao lè ɔzī pínki gũn.

⁴ À zāble pónɔa dõ kũ wuraaoo kũ andurufuoo kũ m̀gotɛo.

⁵ À gbè bèɛɛɛde ana dõ kũ a dana pó gũnwo kũ lí'anaao kũ ɔzī sīnda pínki.

⁶ Abire gbera ma Aisamaki né ɔliabu, Dā buri dītɛ a kpányĩri ũ. Ma ɔzīkerinɔ gbà òndõ ñ pínki, de ò le ò pó kũ ma dītɛnnɛnɔ ke pínki:

7 Dakareki kuta kū doka àkpatiio kū a nékparεo kū kpé pì pò ketenɔ pínki,

8 teburu kū a pò ketenɔ, wura atēne fitiladibɔ kū a pò ketenɔ pínki, turaretitikpataki,

9 sa'opɔ kū òdi ká tén à té kū oki kū a pò ketenɔ pínki, dàga kū a dibɔɔ,

10 pókasa kū ò tãɔ, sa'ori Haruna pókasa kū ani naomainɔ kū a néɔ sa'opɔkasanɔ pínki,

11 pò sakenísi kū bizakuta turaretiti gbĩ nnan-nao. Ò pò pìnɔ ke lákū ma dìtenne nà pínki.

Kámmabogɔɔ yã

12 Dikiri yã ò Musanε à pì:

13 Ñ o Isarailanɔne ò kámmabogɔɔ kū ma dìte yã da, zaakū à de sèeda ũ makū kū ákɔɔ dagura ari á buria, de à le à dō makū Dikiri ma á sé ma gbēɔ ũ.

14 Àgɔ kámmabogɔɔ pì yã da, zaakū gɔɔ pì kúáre adoname. Gbē kū à gɔɔ pì tēε kè, ade gàmε. Gbē kū à zĩ kè gɔɔ pìia, ò ade bo a gbēɔ té ò a de.

15 Àgɔ zĩ ke gɔɔ suddo, a gɔɔ suppladen áni kámma bo, zaakū makū Dikiri ma pómε. Gbē kū à zĩ kè kámmabogɔɔaa gàmε.

16 Isarailanɔ gɔ kámmabogɔɔ pì yã kūna ò dìte gɔɔ zókɔ ũ ari ñ buria ma bàka kunna kūńwo yã ũ.

17 Anigɔ de sèeda ũ makū kū Isarailanɔ dagura gɔɔ sīnda pínki, zaakū makū Dikiri ma musu kū anduniaio kè gɔɔ suddomε, akū ma làka ma kámma bò a gɔɔ supplade zĩ.

18 Kū Dikiri yã ò Musanε Sinai kpi musu à làka, akū à dokayã kè gbè anlonɔa mèn pla kū a zĩda ɔneɔ à kpàa.

13 Ñ dɔ n zɔ̀blerinɔ Ibrahimĩ kũ Isaakuo kũ Isarailao yān, zaakũ n la dànnɛ kũ n zĩdao n pì, ñni ñ buri kara lán susunenɔ bà, ñni bùsu kũ n a yā ònnɛ kpá ñ burinɔa ògɔ̃ vĩ gɔɔ̃ sĩnda pínki.

14 Akũ Dikiri yā kũ à pì áni kipa a gbēnɔaa pìi bò a nēsɛn.

15 Musa ɛra à kipa kpia, à doka gbè anlo mèn pla pìnɔ kũna a ɔĩ. Yā kēna gbèɛ pìnɔa kpa plapla pínki.

16 Luda mé à gbè anlo pìnɔ à, akũ mé à yā kēm̃ma.

17 Yɔsua gbēnɔ wiki mà, akũ à pì Musanɛ: Ñ zĩ wiki ma dɔ bùran.

18 Musa pì: Kũwiki mé à dɔ gwero, wēnda ɔɔ dɔn gwe sɔro, gbēnɔ lèsinaan maten ma.

19 Kũ à kà kãni kũ bùraao, à è òten ũ wā zùsa pì arɛ, akũ à pɔ fē. À gbè anlo kũ à kũnaa pìnɔ pãte kpigerɛɛi gwe, ò wìwi.

20 Akũ à zùsa kũ ò pìi pìi sè à dà tén. À a títi bò, akũ à kà ín à kpà Isarailanɔa, ò mì.

21 Akũ Musa Haruna là à pì: Bón gbē pìnɔ kènne, gbasa n tò ò durunna zɔkɔ dí taka kēɛ?

22 Akũ à wèa à pì: Ñsun pɔ fēro, mare. Ñ gbē pìnɔ dɔ, kũ ò vāni.

23 Mɔkɔnɔ mé ò pìmenɛ mà tāna ke ke à doñne arɛ. Ò pì Musa kũ à á bóte Misila pìi, ò dɔ yā kũ à a lèro.

24 Akũ ma pìnnɛ gbē kũ ò wura vĩnɔ bóte ò suo. Kũ ò sùo, akũ mà kà tén, akũ à bò zùsané bɔrɔɔ pì ũ.

25 Musa è Haruna tò gbēnɔ teni ñ pɔyeina ke, akũ ò gè lalandi pɔ ũ ñ iberenɔne.

26 Akũ à zè bùra zéleá à pì: Gbē kũ ò kú Dikiri kpanɔ su ma kuru. Akũ Levi burinɔ kàkara a kuru.

27 À pìnnɛ: Dikiri Isarailanɔ Luda pì, á baadi a fēneda loko à dodo bùraai zéle kũ zéleɔ, á baadi a

gbēno kũ a gbēnnao kũ a gbēdakeno dede.

²⁸ Levi burino kè lákũ Musa dàńne nà. Gbē kũ ò ń dede zĩ pìiano kà gbēno dúbu aakõ taka bà.

²⁹ Akũ Musa pì Levi buri pìnone: Lákũ a bo á néno kũ á gbēno kpε nà, a á zĩda kpà Dikiria gbāra, Dikiri arubarikaa dàágu gbāran gwe.

Musa kutεkena Dikirine Isarailano

³⁰ Kũ gu dè Musa pì Isarailano: A durunna zõkõ kè, bee kũ abireo mani era mà didi kpia mà gé Dikiri kĩnaa do, òdigõ dõro ke mani le mà kúte kenéare á durunna yã musu.

³¹ Akũ à era à gèε Dikiri kĩnaa à pì: N yã nna! Gbē pino durunna zõkõ kè, ò tãna ke kè ń zĩdane kũ wurāao.

³² Ñ sùru ke! Ñ ń durunna kēńma. Tó lenlo, ñ ma tó warawara takada kũ n kèε gũn.

³³ Dikiri pìne: Gbē kũ à durunna kèmenε tón mani warawara ma takada gũn.

³⁴ Ñ gé kũ gbēno gu kũ ma ònnen sà. Ma Malaika ni donne are. Bee kũ abireo tó ma wétãmmãna goɔ kà, mani wé tãńma ń durunna yãi.

³⁵ Akũ Dikiri gagagyã kà gbēno gu zùsane kũ ò tò Haruna pì pì yãi.

33

¹ Dikiri pì Musane: Ñ fute ñ go la, mɔkõn kũ gbē kũ n bo kũńwo Misilano, ñ gé kũńwo bùsu kũ ma la dà Ibrahimε kũ Isaakuo kũ Yakubuo ma pì mani kpá ń burinoan.

² Mani malaika gbarε à doáre are mani péare Kanaanɔa kũ Amõrino kũ Itino kũ Perizino kũ Ivinɔ kũ Yebusinɔo.

³ À gé b̀usu k̀u v̄i k̀u z'io din p̀i g̀un. Ama mani gé k̄áoro, de màsun á kakate zénlo yáí, zaakū sāgbānadenɔn á ũ.

⁴ Kū gbēnɔ yā pāsī p̀i mà, ò ɔɔ d̀ò, akū gbēke dí a zāblebɔnɔ da doró.

⁵ Zaakū Dikiri ḡinake à yā ò Musane à o Isarailanɔne à pi: Sāgbānadenɔme n̄ ũ, bee tó ma t́aa ò k̄nwo g̀ese do, mani n̄ kakate. N̄ baadi n̄ zāblebɔnɔ bobó, maniḡɔ d̄s deran mani ke k̄nwo nà.

⁶ Akū Isarailanɔ n̄ zāblebɔnɔ b̀obo, odi da doró zaa Orebu kpi k̄naa.

⁷ Musa dì bizakuta sé à gé d̀o b̀ura kpe boruna k̀u b̀uraa p̀iio f̄iti. À t́o kpà kuta p̀iine dakareki kuta. Gbē k̀u à ye Dikiri yáí ade dì bo à gé dakareki kuta p̀i k̄naa b̀ura kpe gwe.

⁸ Tó Musa b̀ò àten gé kpé p̀i k̄naa, baadi dì bo à ze a kpélelele àḡɔ a gwa ari à gé à ḡen.

⁹ Tó Musa g̀e kpé p̀in, t́eluku dì kipa àḡɔ d̀o kpélelele, akū Dikiri dì yā o k̄ao.

¹⁰ Tó gbēnɔ è t́eluku p̀i d̀o kpélelele p̀iia, baadi dì donȳi ke a kpélelele.

¹¹ Dikiri dì yā o k̀u Musao t̄t̄ent̄e, lákū gbē dì yā o k̀u a gbēnnao nà. Musa dì era à su b̀uran, ama Nuni né Ȳosua a kp̄asi dì bo kpé p̀i g̀unlo.

Dikiri bo à suna Musaa

¹² Musa p̀i Dikiriɔ: N p̀imene mà gé k̀u gbē p̀inɔ, ama n̄dí gbē k̀u nten damene omenero. N p̀imene yā n̄ ma d̄s n gbēnna ũ akūɔ ma n p̄onna lè.

¹³ Zaakū ma n p̄onna lè, n̄ t́o mà n laasunnɔ d̄s sà, de mà le màḡɔ n d̄s màḡɔ nna k̄nwo yāpura. Nḡɔ d̄s k̀u buri dík̄ina bi n gbēnɔme.

14 Akū Dikiri wèa à pì: Ma wé nigõ téái mà á gba kámmabonaa.

15 Musa pì: Tó ndi wé téwáiro, òsun ó fute laro.

16 Tó ndi gé kũooro, deran oni le ò dõ kũ makũ kũ n gbẽ pìnɔ ó nna kũnwoo? Oni ó dõkõnẽ kũ buri pãndenɔ andunia gũn deramεε?

17 Dikiri pìnε: Yã kũ n gbèkama pì mani ke, zaakũ n ma pɔnna lè, má n dõ ma gbẽnna ũ.

18 Musa pì: Ñ n gakuri mɔmεnε.

19 Akū Dikiri wèa à pì: Mani tó ma manake pínki gẽ n arε, mani ma tó Dikiri sísi n arε, zaakũ gbẽ kũ má ye mà sùru ke kãaon mani ke kãao, akũsõ gbẽ kũ má ye mà wẽnda dõnen mani dõnε.

20 Akū à pì: Ñni fõ ò ma ãn gwaro, zaakũ bisāsiri ni fõ à wé simale àgõ kunlo.

21 Dikiri pì: Ñ gu gwa da ma sare la. Ñ ze gbèε musu gwe.

22 Tó ma gakuri pì ten gẽ, mani n sɔtɔ gbèsɔkɔn mà a ɔ kúnla ari mà gẽtε.

23 Tó ma a ɔ gònla, Ñni ma kpε kpa e sà, ama oni fõ ò ma ãn ero.

34

Gbè anlo dufunɔ

1 Dikiri pì Musanε: Ñ gbè anlo ke mèn pla lán a káakunɔ bà, mani yã kũ ò kú a káakupɔ kũ n wìnɔa kẽm̃ma.

2 Ngõ kú soru gũn kɔnkɔ. Ñ didi Sinai kpia ò ze ma arε a mìsɔntεa.

3 Gbèke sún su kũnworu. Òsun gbèke e gukea kpi pìia sero. Bee sã ke zù sún su pó ble a gẽiro.

4 Musa gbè anlo à mèn pla lán a káakunɔ bà. À fùte kɔnkɔ káakukaaku, akū à didi Sinai kpia à gbè anlo mèn pla pìnɔ kūna a ɔĩ lákū Dikiri òne nà.

5 Dikiri kipa túsukpe gūn à zè a sare, akū à a zīda tó sīsī.

6 Kū Dikiri ten gē a are, à a tó sīsī à pì: Dikiri, Dikiri Luda wēndadōnneri sūruden ma ũ. Ma pɔ dì fē likaro, má gbēke kū náanio vī zōkō.

7 Madigō gbēke vī kū gbēnɔ ari n buri lémmē, mani n yā vāninɔ kēm̄ma kū n taarinɔ kū n durun-nanɔ. Ama madì tó taaride bo pāro. Madì denɔ yā vāni wí n nēnɔ musu kū n daikorenɔ kū n sākpenɔ kū n nasionɔ.

8 Musa wùte a nèsēle kutena à donyī kènē gōnɔ

9 à pì: Dikiri, zaakū ma n pɔnna lè, n gé kūo. Bee kū gbē pìnɔ sā gbāna, n sūru ke kūo ó yā vāninɔ kū ó durunnanɔ musu n ó sé n pónɔ ũ.

*Luda bàka kunna kū Isarailanɔ
(Bon 23:14-19)*

10 Dikiri pì: Ma bàka nigō kú kǎáome. Mani yābonsare ke á pínki wára, kū gbēke dí a taka ke buri ke gūn andunian zikiro. Buri kū ò likaáinɔ ni ma yākena e, zaakū mani yā naaside ke kǎáo.

11 Àgō yā kū ma òáre gbāra kūna, mani péáre Amɔrinɔa kū Kanaanɔ kū Itinɔ kū Perizinɔ kū Ivinɔ kū Yebusinɔ.

12 À laakari ke! Àsun lédokōnɔ ke kū būsū kū átēn gé gēn denɔoro, de àsun tankute kpákpa á zīdanero yāi.

13 À n sa'okinɔ gboro à n tāna gbènɔ wíwī à Asera línɔ zōzō.

14 Àsun kúte tānanero, zaakū makū Dikiri ma tón Gōba, madì gōba kpá.

15 À laakari ke! Àsun lédokõno ke kũ b̀supidenoro, zaakũ tó òten pãpã ke ñ tãnanõ yã musu, òten sa omma, oni á sísi à ñ sa'ona nõbo só kũnwome.

16 Àsun nõ sé á nẽnoñe ñ téro, zaakũ tó ñ nẽnoñbẽno ten pãpã ke ñ tãnanõ yã musu, oni tó á nẽno pãpã ke kũnwo se.

17 Àsun mò pi tãna ũro.

18 Àgõ Burodi Futenasari dikpe ke. Àgõ burodi futenasari só goro suppla mo kũ òdi pi Abibu gũn lãkũ ma diteáre nà, zaakũ mo pìi gũn a bote Misila.

19 Á daudunõ bi ma pónome ñ pínki kũ á pókãde né sà káakunõ ñ pínki, zù ke pò ketenõ.

20 Àgõ zaaki né sà káaku bo kũ são. Tó ádi boro, à a waka fĩ à de. Àgõ á daudunõ bo. Gbẽke sún su ma kĩnaa okoriro.

21 Àgõ zĩ ke goro suddo à kãmma bo a goro supplade zĩ, bee búwigoro ke pókẽgoroñ yá.

22 Àgõ Pókẽna dikpe ke goro kũ a na burapo káaku kekẽnaaa. Àgõ Pódufublena dikpe ke wẽ lakanaaa.

23 Wẽ kũ wẽeo gõgbẽ sĩnda pínki gõ su makũ Dikiri Isarailanõ Luda are gẽn aakõ.

24 Mani péáre burinõa mani á b̀usu lé karaáre. Gbẽke ni á b̀usu ni de goro kũ áten su makũ Dikiri á Luda are wẽ kũ wẽeo gẽn aakõro.

25 Àsun pófutena kpáma lãele kũ sa'opo aruoro. Àsun Vĩnla sa'ona nõbo dite gu d̀aro.

26 Àgõ gé makũ Dikiri á Luda onn kũ á burapo káakunõ. Àsun blène nõbo kuku kũ a da yõ'ioro.

27 Akũ Dikiri pì Musane: Ñ yã pìnõ kẽ takadan, zaakũ ma bàka kunna kũnwo kũ Isarailanõ yãnoñ

gwe.

²⁸ Musa kú kú Dikirio gwe ari gɔɔ bupla fānantē kú gwāanio póbлена sari pómínaa sari. Akú Dikiri a bàka kunna kúnwo yā mèn kurinɔ kè gbè anlo pìnɔa.

Musa an tékenaa

²⁹ Kú Musa kipa Sinai kpia, à gbè anlo mèn pla kú doka kēaa pìnɔ kúna a ɔĩ. À dɔ kú a an ten té ke n yā'ona kú Dikirio yāiro.

³⁰ Kú Haruna kú Isarailanɔ a è n pínki, a an ten té ke, vīna n kú ò nai.

³¹ Akú Musa n sísi. Haruna kú gbè zɔkɔnɔ èra ò sù a kīnaa, akú à yā ò kúnwo.

³² Abire gbera Isarailanɔ nài n pínki, akú à yā kú Dikiri dìteare Sinai kpi musu ònne pínki.

³³ Kú à yā ònne à làka, à fáta kú a ānwa.

³⁴ Tó à gè à yā o kú Dikirio, àdi fáta go ari à era à bo. Tó à bò, àdi yā kú Dikiri dìteare o Isarailanɔne,

³⁵ akú òdi e a an ten té ke. Musa di era à fáta kú a ānwa ari à era à gè à yā o kú Dikirio.

40

Bizakuta sakēnaa

¹ Dikiri pi Musane:

² N kuta dɔ kú à de dakareki kuta ũ mɔ káakun gɔɔ káaku zĩ

³ N àkpati kú doka gbè anlonɔn kú a gūn ditēn n lábure kpái.

⁴ N gē kú teburuo n a tanɔ kátēa zéazēa. N gē kú fitiladibɔɔ n a fitilanɔ kēkē.

⁵ N wura turaretitikpataki dite doka àkpati are n kuta kpélele lábure kpá n tataale.

6 Ì sa'opo kū òdi ká tén à té kū oki dite dakareki kuta kpéleleá,

7 ì dàga dite dakareki kuta dagura kū sa'okio ì í kán.

8 Ì kara kpá ì likai, ì lábure kpá karaa pì léa.

9 Ì pò sakenísi sé ì kú kpé pìia kū pò kū ò kú a gūnno pínki ì dite ma pò ũ kū a zíkẹbọ́nọ, oni gō ma pò ũ.

10 Ì nísi pì kú sa'oki pìia kū a zíkẹbọ́nọ pínki. Ì sa'oki pì dite ma pò ũ, anigō de ma pò ũ deńla.

11 Ì nísi pì kú dàga pìia kū a dibọ́o, oni gō ma pò ũ.

12 Ì su kū Harunao kū a nénọ dakareki kuta kpéleleá ì ñ zú o gwe.

13 Ì sa'ori pókasanọ da Harunanẹ, ì nísi kúa ì a dite ma pò ũ, ani gō ma gbàgbari ũ.

14 Ì su kū a nénọ dọ ì utagyabanọ dadańne,

15 ì nísi kúkuńma lákū ñ kù ñ dea nà, oni ma gbagba. Nísikummanaa pì mé ani tó ògō de ma gbàgbarinọ ũ ari ñ buria.

16 Musa kẹ lákū Dikiri òne nà pínki.

17 Ì bona Misila wẹ plade mọ káaku gọrọ káakua ò kuta pìi dọ.

18 Kū Musa ten kuta pì dọ, à a zẹbọ́nọ pètepete gĩa, akū à a lípetenọ pèpen à a líkpakpanọ kpàkpan, akū à lípetenọ pètepete.

19 À biza kúa, akū à bára kùtea lákū Dikiri òne nà.

20 À sèeda gbè anlonọ sè à kà àkpatii pìi gūn, à àkpatii pìi sélinọ dà a zánọ gūn, akū à a né kùtea.

21 À gèo kpén, akū à lábure kpà sèeda àkpatii pìi lákū Dikiri òne nà.

22 À teburuu dìte dakareki kutan lábure pì kpélele kpa gugbānduru kpa.

23 À burodii kàtea Dikirine zéazea lākū à òne nà.

24 À fitiladiboo dìte dakareki kutan areḁokōana teburuua gènomidoki kpa,

25 à fitilano nàna Dikiri are lākū à òne nà.

26 Akū à wura turaretitikpataki pìi dìte dakareki kutan lábure sare,

27 akū à turaretiti gbī nnanna kpàtaa lākū Dikiri òne nà.

28 Akū à lábure kpà kuta pì léa.

29 À sa'opo kū òdi ká tén à té kū oki dìte dakareki kuta kpélele, akū à sa'opo kū òdi ká tén à té kū òa kū flawaao lākū Dikiri òne nà.

30 À dàgaa pìi dìte dakareki kuta dagura kū sa'okio, akū à í kàn.

31 Gwen Musa kū Harunao kū a négōgbēno dì ní noo kū ní gbáno pípín.

32 Tó òten gē dakareki kutan, ke tó òten na sa'okii, òdi ní noo kū ní gbáno pípín lākū Dikiri ò Musane nà.

33 Akū à karaa kpà à lika kuta pìii kū sa'okio, akū à lábure kpà karaa pì léa. Len Musa zī pìi kè à làka le.

Dikiri gakuri kipana bizakutan

(Nar 9:15-23)

34 Akū téluku pìi dà dakareki kuta pìla, Dikiri gakuri kuta pìi pà.

35 Musa dí fō à gè dakareki kuta pìi gūnlo, kū téluku dàala akūsō kū Dikiri gakuri kuta pìi pà yāi.

36 Isarailano taa'onaa gūn, tó téluku pìi gò kuta pìia, akū òdi fute kū táo.

37 Tó téluku pì dí goaro, òdi fute kū táoro, sé zī kū à gò.

³⁸ Fãnantẽ Dikiri tãluku dı da kuta pıla, gwãani sã tã dıgã kú tãluku pıi gũn. Len Isarailano dı e le nı pınki nı tãa'ona gũn pınki.

Luda yá takada kú Bisá yáo
Portions of the Holy Bible in the Busa language of
Nigeria

copyright © 2005 SIM International

Language: Bisá (Busa)

Translation by: SIM

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-10-10

PDF generated using Haiola and XeLaTeX on 18 Apr 2025 from source files dated 31 Aug 2023

8631d380-7d17-5581-abf9-174814e8ccc3